

**Sylloge opusculorum ad rem medicam et chirurgicam spectantium, quae primum a cel / Italiae viris edita, nunc, adspersis ... adnotatiunculis recudi curavit J.J. Roemer ... Fasciculus primus. [Fasciculi pathologici. Auctore Joan. Bapt. Monteggia].**

### **Contributors**

Römer, J. J. 1763-1819.

Monteggia, Joan. Bapt. Fasciculi pathologici.

### **Publication/Creation**

Zurich : Ziegler, 1790.

### **Persistent URL**

<https://wellcomecollection.org/works/jqcfrkv3>

### **License and attribution**

This work has been identified as being free of known restrictions under copyright law, including all related and neighbouring rights and is being made available under the Creative Commons, Public Domain Mark.

You can copy, modify, distribute and perform the work, even for commercial purposes, without asking permission.



Wellcome Collection  
183 Euston Road  
London NW1 2BE UK  
T +44 (0)20 7611 8722  
E [library@wellcomecollection.org](mailto:library@wellcomecollection.org)  
<https://wellcomecollection.org>

5305

S Y L L O G E  
O P U S C U L O R U M  
A D  
REM MEDICAM ET CHIRURGICAM  
S P E C T A N T I U M ,  
Q U Æ P R I M U M A C E L . I T A L I Æ V I R I S  
E D I T A ,  
N U N C , A D S P E R S I S H I N C I N D E A D N O T A T I U N C U L I S  
R E C U D I C U R A V I T  
J O A N N E S J A C O B U S R Æ M E R ,  
M e d . & C h i r . D r .

F A S C I C U L U S P R I M U S .

---

T U R I C I H E L V E T O R U M ,  
I m p e n s i s Z I E G L E R I & F I L I O R U M .

M D C C X G .

1490.



VIRO CELEBERRIMO

ERN. GODOFR. BALDINGER,

M. D.

SER. LANDGR. HASSO-CASSEL. A CONS. INTIM.  
ET ARCHIAT. FAC. MED. MARBURGENS.

PROF. PRIMARIO,

S. P. D.

JOANNES JACOBUS RŒMER,

MEDICUS TURICENSIS.

*J*AMDIU miratus sum, inter multas, easque  
egregias, minorum argumenti medico-theoretici  
Et practici opusculorum, collectiones, quarum  
copia haud parva gaudet patria nostra, nullam  
hactenus prodiisse, quæ celeberrimorum Italiæ

medicorum scripta comprehendenderet : idque tanto magis miratus sum , quanto plura in dies mibi innotescerent illius regionis virorum opuscula non solum haud contemnenda , sed optimis quibusvis adnumeranda , non ut alibi fieri solet , aliorum placitis plena , sed propriis cum observationibus tum cogitatis referta.

Contigit mihi , ut , haud parvis quidem sumtibus , recentiorum atque veterum medicorum Italiæ operum numerum omnino non spernendum mihi acquirerem , amicorum benevolentia Italorum quotannis augendum , & ingenue fateor , me multum ex iis didicisse , soliditatemque atque doctrinam in iis animadvertisse quam cuivis optasse hæc vel ignorantι vel contemnenti. At nihil mirum , Germanis , cæterum de omni scientiarum genere & fonte sollicitis , atque cognitionum rei litterariæ ambitu omnes gentes longe superantibus , Italorum in scientiis

progressus minus adhucdum esse notos, quam  
cujuscunque alius gentis. Montium cacumina,  
mentium abalienationem & præoccupationem,  
bibliopolarum Italorum incuriam, & difficulta-  
tem commercii litterariorum in illis regionibus, in  
causa esse duco, cur hæc ita sint & esse debeant.  
Non defuerunt quidem viri, has tenebras pro  
virili dispergere conantes, quorum e numero &  
te esse, Vir Illustrissime, quis est qui non grato  
animo agnoscat? Sed idem Tu omnium optime  
calles, num varia illa conamina lucisque facta  
omnem paginam absolverint? Videtur enimvero,  
rei cujuscunque notio non in eo consistere, ut  
librorum de illa scriptorum titulos omnes ac  
singulos enarrare possim: juvant hæc quidem,  
sed nisi accedat librorum ipsorum lectio, vel  
saltem contentorum absolutissima & accuratissima  
enarratio, quem inde fructum erimus capturi?  
Nonne plerisque satius foret etiam titulos illos  
non nosse, quam Tantali pœna torqueri?

*En rationem, cur Syllogen hanc typis man-  
dare studui, quam quidem non ex primo fasci-  
culo dijudicabunt æqui harum rerum arbitri,  
cum preciosus Bibliopolæ quasi coactus, citius  
illam ediderim quam animus mihi fuit. Quisque  
sequentium fasciculorum plura ejusmodi scripta  
continebit, pluresque, ubi opus erit, adnotatio-  
nes additas reperies. Jam secundum fasciculum  
varia κειμηλία contenturum spondeo, tertioque  
vel quarto fasciculo ipse ego conspectum Historiæ  
medicæ apud Italos, & Fragmenta Bibliothecæ  
Medicorum Italorum subjungam atque, si  
gratum fore Lectoribus video, excerpta subinde  
e melioris notæ italicico sermone conscriptis libris  
addam.*

*Quod Monteggiam nostrum attinet, prodiit  
liber ejus Mediolani anno 1789. Observationes  
nobiscum communicat non omnes quidem absolu-  
tissimas & ab omni imaginationis atque opi-*


*nionum labe puras , sed plerasque memoratu  
dignas & haud ita male enarratas.*

*Nihil magis in votis mihi erit , quam ut rei  
medicæ in Germania amatoribus non displiceant  
hæc meæ conamina , & ut melius de doctrina  
illius gentis judicare discant , quam illi fecere ,  
qui præoccupata mente Italiam adiere , & serio-  
ribus studiis nunquam dediti tamen de eorum  
in Italia statu judicium ferre conati sunt , imma-  
turum illud quidem & iniquum quammaxime ,  
sed sermonis lepore ita decipiens , ut quemque  
non meliores fontes adeuntem in errorem facile  
inducat , e quibus Archenhölzium esse , quis est  
qui neget ? ... Sed est quod gaudeam , hujus viri  
ineptias de die in diem magis palam fieri , &  
observari , neque Anglos neque Italos æqua-  
mente & candide ab ipso fuisse depictos.*

*Tu interim, Vir Celeberrime, præclaris Tuis  
conatibus rei medicæ & litterariæ studium pro-  
movere numquam desine, fave mihi, fave  
cœptis meis. Vale.*

*Scrib. Turici d. 24 Mart. 1790.*

F A S C I C U L I  
PATHOLOGICI  
A U C T O R E  
JOAN. BAPT. MONTEGGIA.



Digitized by the Internet Archive  
in 2018 with funding from  
Wellcome Library

<https://archive.org/details/b30362878>

---

# M O R B I

S Y M M E T R I C I , E T A S Y M M E T R I C I .

---

CADAVERA quædam puerilia forte olim  
invisenti, biennis sese obtulit puella, quatuor  
spectanda abscessibus, singulari ratione distri-  
butis; scilicet horum primus in sinistra faciei  
parte, præ aure positus erat, & cute adhuc  
integra prominens, suppurratam parotidem pro-  
xime mentiebatur. Sectione instituta, comperi,  
parotide nihil vitiata, abscessus materiam ex  
illo oriri temporalis ossis finu, qui maxillæ infe-  
rioris condylum recipit; quorum ossium super-  
ficies cariosa erat, cartilaginibus nempe articu-  
lum obvestientibus, suppuratione undique abrasis.  
Abscessus alter a dextris prostabat, & eodem  
adamussim, quo siniste, loco positus, easdem  
omnino partes vitiaverat, mira comparis vitii  
imitatione. Tertia suppuratio incubuerat humero  
dextro, quæ a parvo fistuloso orificio anterius  
incipiens, ad ipsam ducebat ejus articulationem  
cum scapula, quæ una cum viciniis copioso

A

pure redundabat; & huic similis altera ad humerum sinistrum suppuratio conspiciebatur, si id unum excipias, quod paullo altius posita, claviculae magis cum acromio articulationem affecerat (1).

Vides ergo bigeminos abscessus fatis inter se similes, & symmetrico fere modo dispositos. Id mihi primum in causa fuit cur de symmetrica quorundam morborum collocatione cogitarem. Cui enim mirum non fuisset, partes tam dissitas tam simili modo fuisse affectas? Atque inde philosophia symmetrica hujus exempla suppeditare praxis non destituit.

Passim videre est, quod in memetipso expertus sum, dente aliquo carie infecto, lateris alterius comparem dentem simili morbo laborare.

Mutitas, & surditas, quae facultates adimunt duplicitibus organis innixas, aliud exhibent argumentum facilitioris similibus in partibus morborum coexistentiae.

Oculorum etiam morbi aliquam videntur symmetricam affectare, dum binos saepe oculos conjunctim afficiunt. Amaurosis praeceteris, & cataracta raro occurruunt solitariae.

(1) Pulcherrimam abscessuum, symmetrica ratione sibi mutuo respondentium, historiam vide in Bertrandi oper. anatomico-chir. tom. 5. pag. 159., nota (b).

Insuper qui aliqua ex parte mutilus a nativitate est, raro eundem defectum in artu ei symmetrice respondente non patitur; qui contra excessu quopiam notati sunt, inutiles additiones plerumque pares habent. Sex in utraque manu digiti ob oculos subinde veniunt: sex in utroque pede.

Huc attinet & illa frequens loxarthri congeniti similitudo, qua id vitii genus, quod, ex gr., in uno pede observatur, alterum pari jure deformat, ut ne sectione quidem ullum vitiatis in partibus discrimen appareat: quasi lex naturæ ea sit, ut quemadmodum bene conformati artus mutuo non differunt, sic & similia vitia fortiantur, ubi alteruter a naturali dispositione recesserit.

Atque hæc symmetricorum morborum specimen funto. Asymmetricorum vero nomine nobis erunt ii morbi, qui ex geminis partibus, vere, aut apparenter æqualibus, unam tamen quodammodo prædiligant, eam sæpius, quam alteram invadendo.

Sed antequam de iis loquar, juvat animadvertere, in singularum partium conformatio minus re ipsa symmetricam fuisse naturam, quam vulgo videri velit. Nam, ut mittam quæ notissima sunt, & quorum aliquis mihi erit usus in

posterum, illam nempe quædam in pectore, multa in abdomen plurima in vasorum distributione secus disposuissé, ac externa corporis facies præ se ferat: vasa dexteri brachii paullo ampliora sunt quam in sinistro (1); anfractus cerebri in unoquoque hemisphærio non eadem ratione diriguntur (2); sinus frontalis sinister dextero sæpe est grandior (3); atque his similia.

Naturali isti humani corporis asymmetriæ nos insuper aliquid addimus, cum similes partes, sive sponte nostra, sive natura suadente, dissimiliter exercemus. Satis communis est habitudo, qua dormientes dextero libentius, quam sinistro lateri incumbimus (4)? & multo magis vulgata est dexteri brachii præ sinistro exercitatio, quæ adeo quidem invaluit, ut plura jam sint, quæ læva manu perficere, indecorum habeatur. Atque huc etiam vetus institutum referri potest, quo Amazones ab historicis adeo celebratæ, mamma dextra privatæ ab infantia vivebant, ut brachii

(1) Sabatier Traité d'Anatomie Angelologie.

(2) Gunzius. Sœmering, de basi Encephali.

(3) Morgagni advers. anat. I. n. 28.

(4) Aliter in hac re cum nonnullis aliis censet Swietenius §. 1415. sed, opinor, minus vere.

dextri sive libertatem ; sive fortitudinem adau-  
gerent ( 1 ).

Atqui ab hujusmodi inæquali manuum agili-  
tate multa in artes omnes oriuntur incommoda.  
Sed ne a nostris discedam, quanquam *Celsus*, ( 2 )  
& qui eum secuti sunt, artis Magistri, gene-  
ralia præcepta tradentes, passim jufferint Chirur-  
gos eandem in utraque manu sibi promptitu-  
dinem comparare; attamen nec multo nos pro-  
fecisse compertum est, neque eos multum spe-  
raffe dices, de confirmata nimis habitudine  
corrigenda. Quoties enim suas operationum  
instituendarum descriptiones tradunt, leviora,  
ubicunque id fieri possit, sinistræ manni munera  
demandant ( 3 ). Res quidem ut plurimum ita  
se habent, aut ita disponi possunt, ut nullum  
fere inde veniat impedimentum; longe tamen  
abest quod id perpetuum esse queat. Etenim,  
ex. gr., in lithotomia exercenda durities aliqua,  
vel profunda cicatrix, aut mala ossium confor-  
matio, ita sinistrum perinæi latus præpedire

( 1 ) V. Hippocr. de aer. aqu & locis lib. 5. n. 30. &  
doctissima in eum Septalii nostri commentaria.

( 2 ) De medic. præfat. ad lib. 7.

( 3 ) Hoc adeo verum est, ut in ipsamet cataractæ  
depressione cel. Sharp. docuerit, chirurgum ad poste-  
riorem stare ægroti partem, ut dextra manu & in oculo  
dextro uti posset. Op. Chir. cap. 28.

posset, ut necessario ad dextrum confugiendum esset: amygdalæ item dextræ rescissio forficibus ægre perficitur, veluti de se ipso fatetur experientissimus cæteroquin *Caqué* (1), quia forfices manca manu vix bene adhibentur (2); saphena interna in pede sinistro minus commode manu dextra pertunditur; & alia multa, in quibus alterius manus ineptitudinem chirurgi passim dolent. Huic malo an certum parari possit remedium, ego quidem definire non ausim; crediderim vero inde unice boni aliquid esse sperandum, si tyrones chirurgi serio admoneantur, cum primum artis instrumentis inexpertus admovent manus, ea protinus tum læva, tum dextera pariter pertractare, ut eandem eodem tempore, parique gradu utrinque habitudinem acquirant. Experientia enim testis est, impeditam hærere manum illam, quæ ad actionem instituitur, cui altera jam assuevit, contra vero rebus novis eadem quasi facilitate manus utraque aptatur; exemplo sint qui musicis instrumentis dant operam. Ii siquidem cum initio singulis digitis necessario utrinque ludant, miram æqualemque fere manuum promptitudinem repetita exercitatione sibi

(1) Memoir. ac. chirurg. Paris. tom. 14. edit. in 12.

(2) „On est rarement ambidextre avec des ciseaux. Lovis. ibidem.

comparant. Quod equidem fœminis æque ac hominibus commune est, ut minus vere ab Hippocrate dictum sit: *Mulier ambidextra non fit* (1). Sed de his nimis multa; en me jam de asymmetricis morbis loquentem.

Ac primum fuit a *Riolano* observatum, scapulam dextram ob majus fortasse brachii dextri exercitium a muliebri thorace extricatam, saepius præ sinistra, indecoru puellis prominere (2).

*Carolus Piso*, *Boerhaavius*, aliquique renales calculos longe frequentiores sinistro in rene observarunt (3). Atque hujuscce rei causam *Hoffmannus* deducebat ab intestini coli pressione, sinistro reni proxime adjacentis. Sed huic altera addi potest, venarum scilicet emulgentium diversa admodum ratio; earum enim sinistra pulsantem aortam super scandens, longiori decursu ad cavam pervenit, eique sub recto angulo inferitur: dextera vero brevior, & nonnihil inclinata, facilius in cavam ipsam sanguinem fundit.

Simili modo se habent testium vitia, quæ saepius, ut in renibus, sinistro obveniunt; idque

(1) Aphor. 43. sect. 7. vide etiam comment. ad hunc locum.

(2) Encheiridium anat. lib. 6. cap. 7.

(3) V. Van-Swieten §. 1415. Morgagni Epist. An. Med. 40. n. 12. 13.

de hydrocele pronunciarunt *Dodonæus* præsertim & *Hildanus*; de cyrfocele *Arantius* (1); de inflammatione, quæ in validis nisibus quandoque excitatur, *Le Dran* (2); de reliquis autem morbis idem affirmare ex propriis observationibus non dubitarem. Rem hanc *Morgagnus* ab illa repetebat, quam nuper innuimus, lentiori sanguinis progressionе in sinistra vena emulgente; hæc enim sine aliqua retardatione esse nequit sinistræ venæ spermaticæ in illam plerumque confluentis (3), secus ac dextra faciat, quæ cavam petit. Non tamen una hæc est moræ causa. Etenim cum vis impellens ab arteriis derivata, in utraque spermatica vena eadem sit; renalis autem sinistra vena altiorem occupet locum, hinc sanguis a sinistro teste redux altius ascendere debet, gravioremque sibi incumbentem propellere columnam; pro ratione igitur diversæ hujus altitudinis, tardius excurrat necesse est. Insuper e venis spermaticis quæ dextera est, cavam subiens angulum efficit peracutum,

(1) V. Morgagni epist. 43. n. 34.

(2) Observat. 71.

(3) „ Dans la dissection que j'ai faite plusieurs fois „ des testicules des hommes, j'ai souvent remarqué que „ le gauche avoit des veines & des arteres plus grosses „ que l'autre &c. (Vénette tableau de l'amour conjugal &c.)

minorem certe 45. graduum; sinistra vero ad angulum rectum in emulgentem fluit; ex quo fit ut venæ istæ inæquāli facilitate proprio truncō fanguinem committant. Neque vero prætereunda est altera huc faciens *Dranii* animadversio, colon scilicet intestinum, satis frequenter & flatibus & excrementis distentum, dum a sinistra ad dextram inflectitur, rōmanum S. efficiens, vasa spermatica sinistra supergredi, proindeque & premere posse. *Morgagnus* sane vidit testium dolores, & intumescētias, ab iliorum flatulenta tensione subortas, flatibus remittentibus evanuisse (1). Adolescens venereo sinistri testis tumore laborans, manifesto magis dolebat, ubi flatulentos cibos ingessisset.

Hisce opposita est ratio inguinalis herniæ, quæ dextro in latere frequentior observatur (2). Hac de re qui certior fieri velit, quascumque offenderit hujuscemodi hernias, sive dextras sive sinistras in schedulis adnotet, illarumque excessum facile deprehendet (3). An ex eo quod in latus

(1) Epist. cit. n. 40.

(2) Excipiendæ fortasse epipleules sunt, quæ a sinistris frequentiores dicuntur. V. disput. chir. Haller. Quæstio an in Herniis &c. tom. 3.

(3) Idem appareat ex notula quadam a Sabatiero tradita in Mem. ac. chir. tom. 15.

dextrum libentius decumbimus, intestina in abdomine laxo nexu mobilia, proprio tunc pondere ad latus dextrum concurrunt, dumque respirationis, tussis, sternutationis motibus agitantur, abdominalis anuli dextri vicinias sæpius urgent, qui sic una cum peritonæo sensim debilitatus, facilius cedat partibus in hernia detrudendis? Conjecturæ alioquin probabili adversari videtur Cl. *Wrisbergi* observatio, quæ docet, hernias quoque congenitas a dextris frequentius apparere (1).

Cl. *Portal* in eruditis, quibus *Lieutaudium* illustravit, commentationibus obiter ait, longe plures cystoceles in parte dextra, quam in sinistra fuisse notatas (2); idque ex vesicæ urinariæ positione deducit, quam ad latus dextrum nonnihil inclinare contendit. Verumtamen cum hujusmodi vesicæ obliquitas minus vera videatur; & ex iis, quæ extant, cystocelis exemplis non pauca ad latus etiam finistrum referantur, de generali computationis istius veritate liceat dubitare (3).

(1) *Observ. anat. de testic. ex abdom. descensu.*

(2) *Essais d'anatomie. Tom. 2. pag. 257.*

(3) Sabatierus e contra vesicam ad finistrum latus inclinatam esse credit, proindeque lithotomiam laudat hoc in latere institutam; quamquam in hac re manus commoditatem magis chirurgi respexisse, quam vesicæ tum videantur.

Punctorius pleuritidis dolor in variis hæret pectoris locis; plerumque tamen latera occupat, & in his latus dextrum frequentius. Id observarunt in primis celeberrimi *Triller*, & *Van-Swieten* (1); quibus etsi minus assentiat Cl. *Cullen* (2); mihi nihilominus eorum sententia ex meis etiam observationibus verior est. Sed undenam pleuritidis dextræ frequentia? An aliquid conferunt major a dextris pleuræ, & pulmonis amplitudo; major etiam motus, & frequentior decubitus?

Cl. *Rosenstein*, in primo docet, variolarum stadio sinistrum speciatim oculum lacrymis irrigari (3).

Simile quid obtainere opinor in criticis tumibus, qui per acutam febrim glandulis parotidibus superveniunt, nomenque a sede desumunt. Ægrorum frequentia in amplio Nofocomio non paucos obtulit observandos, eosque, cum unici apparuerunt, longe plures sinistram parotidem invasisse memini, idemque schedæ testantur, in quibus aliquas ex illiusmodi observationibus referebam.

Hujuscce rei causam aliquam inferius innuam.

(1) §. 877.

(2) Institut. de medecine tom. I.

(3) Malattie dei Bambini cap. 12.

Nunc mihi in promptu sunt animadversiones quædam ad tumorum istorum indolem spectantes, quas hic inferi Lectores meos eo facilius passuros esse crediderim, quod a *Morgagno* nihil hic accepimus, fatetur enim, ex parotidibus febrilibus se nullam unquam dissecuisse (1). Propositum mihi igitur in primis fuerat, quænam esset vera morbi sedes sedulo indagare, an scilicet tumoris materia extra glandulam hæreret in cellulofo ejus involucro, an potius in ipsamet interiori propriaque glandulæ substantia, & hoc quidem ultimum in parotidibus febrilibus obtinere comprehendendi; alterum in quibusdam ejusdem glandulæ tumoribus: qui lymphaticæ præsertim naturæ sint. Rem exempla docebunt.

Vir trigenarius, synocho putri decumbens, parotidem a sinistris emisit, quam sexto ex quo eruperat die alicubi emollitam, per tenuissima, & livescentia fere integumenta lanceolam adigens aperii, prodiitque ichoris aliquid cruenti, & subnigri, cuius guttulæ quædam ex aure biduo ante manaverant. Postridie mortuus est. Sectione parotidem glandulam simili humore penitus imbutam vidi, fere corruptam, nec ullam amplius folliculosam faciem servantem. Inde putredo ad medium usque colli partem, nec non ad pha-

(1) Epist. 50. n. 27.

ryngis amygdalæque vicinias propagabatur. Parvum etiam foramen in cartilaginofo auris ductu reperi, per quod humori aditus ad aurem patuit.

Vir obesus (1), febri defunctus, duriuscum, & prominentem parotidis tumorem utrinque exhibebat. Glandula ergo dissecta, albo pure undique scatuit, quod tamen non in uno communi cavo continebatur, sed per singulos lobulos distributum, veluti e distinctis crassioris spongiæ poris, pressione eliciebam. Ipse met etiam stenonianus ductus, sub parvi intestinuli forma, pure turgebat, cuius guttulam aliquam in os fudit, modicam tamen ob hiatus angustiam, quæ subtilius specillum non admittit; ut cum *Petito* merito rideas vana illorum confilia, qui in usu specilli ad stenoniani ductus obstructiones referandas nimis confidunt (2). Posset quidem aliquam afferre utilitatem frequens in febribus buccarum abstercio, ne sordes ductus illius ostiolo adhærentes salivæ exitum intercipiant; quin immo non alienum esset mitioribus syalagogis ore agitatis hanc excretionem nonnihil promovere, ut humor hac ruens, & materiæ criticæ admixtione ad stases pronus, facile minus

(1) Plenioris obesique corporis habitus criticis parotidibus obnoxii magis esse videntur.

(2) Traité des mal. chir. tom. I cap. 4.

glandulam infarciat. Etenim salivæ etiam sanæ retentio parotidis tumores excitare valet.

Puero ann. 13. sub synochæ febris finem orta in ore gangrena omnem a dextris buccæ substantiam exederat; eaque cohibita, dum marginibus ulceris cicatrix adnascebatur, factum est, ut stenoniani ductus extremum, quod ad masseteris limbum anteriorem detruncatum terminabatur, a cicatrice non parum angustaretur. Quamobrem parotis glandula aliquo cum dolore subtumuit, noctu præfertim molesto (1). Ductus ego orificium cum frustra oculis persequerer, tumidulam parotidis regionem comprimebam, & illico canalis orificium indicans, ex quadam exigua fede rivulus salivæ erupit, subsidente parotidis intumescentia, quæ deinde non secus ac dolor, aliquandiu repetita compressione præcaveri potuit. Licuit etiam in hoc puero egregias decocti chinæ vires experiri; cum enim ægro ad scorbutum prono, diuque in inquinato nosocomii aere degente, gangrena pluries in genæ ulcere renovaretur, eam decocti illius ablutione, filisque intrisis, plusquam decies cohibere felicissime potui. Alterum insuper phænomenon in hoc animadverti, cum scilicet cicatrix sub

(1) Idem ab ejusdem ductus compressione contigisse vide in mem. ac. chir. tom. 9.

oculo dextro fieri cœpit , ejus tunc palpebræ insigni , diuque persistente ædemate intumuerunt . Quod mihi novum non fuit , videram enim alium ante puerum , cui , cum magnum vulnus ex calcis ictu in mala sinistra recepisset , extractisque nonnullis osseis fragmentis , cava cicatrice superstite sanatus esset , a cicatricis tamen constrictione palpebræ sinistri oculi pertinacissimo ædemate fuerant affectæ . Eiusmodi ædema nasci solet etiam in iis , quibus fascia sub naso ad labii leporini conglutinationem transversim ducitur ( 1 ) ; quemadmodum & alibi eadem cicatricis adstrictio reduci sanguini vel lymphæ obiciem faciens , ædematosam intumescentiam inducit . Magna tibiarum ulcera ad cicatricem perducta , pedis collum diu tumidum sœpe relinquent . Tumebat longo satis tempore penis glans in adolescente , cui gangrena omnia penis integumenta cum toto præputio absumperat ; deinceps per totam penis longitudinem arcta cicatrix superinducta fuerat . Gangrena hæc a vinculo quodam per jocum medio peni injecto suborta , destructionem colis totius minitabatur . Ego vero similes alias gangrenas ex ulceribus , puta , venereis ortas reminiscens , tuto prædixi , præputium dumtaxat , nec non integumenta penis

( 1 ) Lovis Mem. cit. tom. 12.

fore peritura, quod ubi factum fuisset, gangrenam illico cessaturam. Est enim nonnullis in morbis *distantia* quædam *specifica* (1), quam ipsi raro prætergrediuntur. Gangrenæ illæ, quæ venereis bubonibus interdum superveniunt, in latiori quadam, sed fere in omnibus æquali area consistunt. Membrorum sphaceli sæpius ad articulos definunt &c.

Sed ut ad humoris & vitii sedem in parotidis tumoribus redeamus, illud est animadvertendum, quod licet parotidis febrilis materia in ipsa glandula deponatur; non id tamen omnibus generale est, quemadmodum in homine vidi a diurno femoris vitio ægrotante, cui paucos ante obitum dies utraque parotis intumuerat, licet sinistra tantum ad mortem usque perfisterit. Huic enim tumor a lympha solum, circumambientem cellulosam irrigante, efficiebatur: quin immo lympha quoque madebant cellulosa septa, quæ glandulæ lobulis interjiciuntur, lobulis iisdem a se invicem paullo quidem disjunctis, sed nil prorsus vitiatis.

Illud huc faciens omittendum non est, quod sæpius observavi, satis magnum una cum

(1) Novum nomen a cel. Huntero usurpatum, ut consuetam in urethra vitii gonorrhœici limitationem indigitaret. (Traité des malad. vener.)

parotidibus in temporali regione adesse ædema, cuius causa procul dubio repetenda est a tumoris mole, venam temporalem comprimente. Solet enim hæc vena continuo supra parotidem sanguine turgida conspici, eamque in hujusmodi ægrotis, avulso etiam capite plenam vidi, quando rescißis omnibus venarum truncis, fere omnem alioquin cruentem facile amisisset. Neque vero simplex tantum ædema, sed durior non sine dolore tumor, & ipsiusmet crotaphitis musculi vera inflammatio febriles parotides interdum comitatur.

Sexagenario viro parotis febrilis a dextris oriebatur, quam cito subsidentem altera a sinistris excipiebat, in abscessum terminanda. Incisione sub aure facta, ulcus ibi per mensēm superfuit, multa scatens materia, cuius aliquantulum quotidie ex aure prodibat. Æger interea, soluto licet primario morbo, nondum bene convalescens, diu languens, iterumque in pejus ruens, soporosus interiit. En autem quæ se mihi in cadavere offerebant. Omnis cellulosa tela in sinistro capitis latere lympha madet undique. Parotis glandula veluti contracta, strigosa, & duriuscula, rubrisque hinc inde punctis notata est (1). Ab externo autem incisionis loco ulce-

(1) An ab hujusmodi parotidis constrictione,

rosa via ad meatum auditorium patet, cuius cartilago erosa partim conspicitur; proxima canalis ossei pars, una cum radice apophysis zygomaticæ, carie infectæ visuntur; quædam etiam ossea fragmenta mobilia occurrunt in auditorio ipso meatu, quibus se se addunt nonnulla velut hic emortui insecti testacea spolia; temporalis musculus prægressæ inflammationis non dubia retinet vestigia, & aliquæ puris guttulæ sub eodem latent, cranii superficiem alluentes. Cranio ferra patefacto, intermeningeum spatium visum est majorem a sinistris lymphæ copiam fundere, venis hic insuper turgidioribus. Crassam deinde meningem ab interna hujuscæ lateris cranii facie divellendo, area quædam apparuit purulenta, semipollicem lata, & processui petroso ibi imposita, ubi foramina adsunt *Valsalvæ*, ad timpani caveam ducentia: neque tamen puris origo ab eadem cavitate est, in qua nullum se prodit vitium. Etenim suppuratio illa, quam supra descripsimus, crotaphiti & cranio interposita, nonnullas puris guttulas in cranii cavitatem stillaverat per obvium foraminulum in osse temporali emissi-

tercurrentes nervos strangulante, repetenda est illa labiorum, & palpebrarum retractio, quam ab hisce tumoribus relictam vidit Petit? Loc. cit.

riorum more conspicuum, ex quo dein linearis tramite posteriora versus humor excurrens, in purulentam quam diximus aream confluebat. Non maximum quidem erat vitium, sed insolita, singulari, & omnino periculosa propagatione spectandum.

Cæterum, ut ad asymmetriam nostram tandem redeamus, liquet & ex paucis, quorum hic mentio fuit, parotidum morbis, frequentior illa a sinistris intumescentia, quam ab initio proponebamus. Quod si opinio hæc nostra generatim vera est, obscurior certe, & explicatu difficultis evadit. An ex frequentiori dextro decubitu, parotis glandula, cui dormientes incumbimus, diu compressa, angustiorem, firmioremque structuram adipiscitur, ut criticæ morbosæ materiæ irruptioni magis, quam altera resistat? An a diversa venarum jugularium dispositione? Evidenter earum dextra ad venæ cavæ superioris bifurcationem ita se confert, ut in illam ferme directo influat; jugularis autem sinistra, longe a cava remotior, in subclaviam sinistram transverse positam inferitur, cuius directionem ad rectum angulum fecat. Ex quibus fane aliquam in sanguine, a sinistro capitis latere descendente, retardationem suspicari proclive est.

Neque aliam reor quis jure explicationem

posceret, ubi accuratiores aliquando, & ad rem institutæ observationes certo docuerint, num forte in sinistra cerebri regione paullo frequenter occurrant morbi, quam in dextera. Oppositam quidem sententiam ferme amplexus fuerat Cl. *Morgagni*, cum ex quindecim cerebri vitiis vidisset, decem a dextris extitisse; duo utrinque; tria dumtaxat a sinistris (1). Adhuc tamen, ne hæc sibi fortuito contigissent, vir prudentissimus dubitabat, & in sequentibus litteris (2) exempla ingenuus addidit, quibus priorem suspicionem ipfem et infirmaret. Nobis quidem ea non suppetit observationum ubertas, qua aliquid liceat post tantum virum non temere pronunciare; attamen nil vetat, quominus nostra, quæcumque ea sint, adversaria revisentes, in vitia incidisse a sinistris majora numero fateamur; longeque plures vidisse hemiplecticos dextera corporis parte resolutos.

Aliud fortasse asymmetricorum morborum genus est claudicatio. Curiose enim in varia claudorum vitia per anatomen inquirenti, crus sæpius sinistrum in cadaveribus brevius occurrit, quin & ex illis, in quos pañim obvios offendimus, claudi a sinistris plures sunt. An

(1) Epist. 3. n. 18.

(2) Epist. 11. 62.

ex inæquali superiorum artuum promptitudine, simile quid, et si minus evidens, pedibus inest, unde sinister scite minus humum signet, faciliusque gliscens, frequentiores a sinistris lapsus efficiat?

Atque hic quemadmodum paullo ante de parotidibus feci, temperare mihi non possum, quin de claudis ex meis observationibus quædam interseram. Cl. *Morgagni* inter cætera notavit, vasa in parte clauda magis extenuata se vidisse (1); quæ res et si plerumque vix sit oculis distinguenda, non dubito tamen fore, ut in iis vera deprehendatur, quibus vel ob claudicationis diuturnitatem ab ineunte ætate contractæ, vel aliam ob causam simul adsit claudi artus atrophia. Frequentius ego vidi internam tantummodo saphenam paullo altera angustiorem.

Digna est etiam, quam jure memores, vasorum altera in claudis differentia, nempe major quædam eorum affecto in latere brevitas, ex eo manifesta, quod origo præcipuorum ramorum ex vasis trunco altior plerumque est in parte clauda, quam in opposita. Enim vero arteria, ex gr., cruris profunda, & saphena major, cum fociis alterius lateris comparatæ, propiores longe inguinali ligamento in clando artu oriuntur,

(1) Epist. 56. n. 10. II.

quasi ex illius decurtatione, venis, arteriisque simul retractio quædam obtigisset. Quin immo eandem semel reperi differentiam in interna iliacarum divisione, idque in senis cadavere, a dextris claudi, cui quatuor transversis digitis crus brevius erat. Lineis enim utrinque ab initio hypogastricæ arteriæ ad vertebrae transversim ductis, dextra definebat in imam partem corporis postremæ lumborum vertebræ; sinistra autem in altitudinem medium cartilaginis, qua eadem vertebra sacro ossi adnectitur. Plerumque tamen hæc vasorum differentia infra ligamentum inguinale tantum occurrit. An hisce non absimilia indicabat *Morgagni*, cum paullo obscuriori sermone ait, in foemina a sinistris clauda se vidisse *arteriam iliacam sinistram non pari ac dextram longitudine, sed tertia parte breviorem* (1)? Cæterum non ignoro, inæqualem hanc altitudinem in ortu iliacæ internæ naturaliter aliquando contingere.

Aniculæ cadaver lævum crus quatuor transversis digitis dextro brevius habebat. Ossis vitium claudicationis congenitæ mihi suspicionem induxit: femur quippe suo capite, & fere omni cervice carebat, cuius loco informe modo & parvum tuberculum eminebat. Quod vero huc

(1) Loc. cit. n. 10.

referas & facile mireris , saphena dextra angustior, e contra quam sinistra visebatur ; præterea ejusdem lateris cruralis vena , vix infra inguinis ligamentum , a parietum concretione adeo coarctata erat, ut sanguini fere prorsus impervia, ne tenuerit quidem potuerit sub constrictionis loco specillum admittere. Rarum hoc obcæcatæ propemodum cruralis venæ exemplum facile opponas *Morgagni* observationi , quæ consimilem fere iliacæ venæ obstructionem, in ipso claudicationis latere reperitam, exhibet ( i ).

Spectat etiam ad vasorum mutationes insolita quædam extrorsum incurvatio , quam sœpe claudicuris vena & arteria sub inguine patiuntur , ubi femoris caput posteriora versus exciderit : scilicet hac in specie insignis cavitas in musculi pectinæi regione conspicitur , in macilentis evidentior, cuius cum vasa cruralia profonditatem emeantur , necesse est , ut ab assueta directione declinent.

Flexuosum denique insigni modo vidi vasorum decursum in toto femore sinistro , ab obliqua fractura jamdiu conferruminata duos pollices breviori , in quinquagenariæ foeminæ cadavere , quæ insuper perfectum infracti artus genu , quod fere extensum erat , ankylosin habebat , ab

( i ) Loc. cit. n. 11.

hærente intra articulum causa inductam. Etenim cum immobilis articuli cavum reserassem, vidi rotulam cum priori parte condylorum femoris, cartilagines vero semilunares cum tibiæ & femoris faciebus strictissime coalusse; tibiæ tuberculum medium, in sinu illo receptum, capita femoris separante, adeo firmiter ibi inhærebat, ut cum extensi articuli flexionem vi tentarem, idem tuberculum a tibia secesserit, pertinacissimam cum sinu femoris unionem adhuc servans. Tanta porro partium cohæsio non erat ab illa, plus æquo apud multos celebrata, synoviæ concretione, quam ego fane nunquam vidi, nec multos qui viderint facile reperies, cum e contra raro illam occurrere alias etiam pronunciaverit Cl. B. *Moscati* (1), aliquique ejusdem academiæ sodales celeberrimi. Nostro quidem in cadavere frequentissimæ & brevissimæ aderant ligamentosæ fibræ, quæ ab una ossium facie assurgententes, in obviam alteram continuo inferebantur; eademque cum paullo magis crassæ essent, latæque circa dictum femoris sinum, & tibiæ tuberculum, firmiorem idcirco nexum efficiebant. Quod si hujusmodi fibrarum genesim quæras, res diversimode explicari potest: vel enim mucus quidam, inflam-

(1) Ac. chir. tom. 10. Mém. sur la fracture du col de l'Humerus.

mato forte ob iictum genu , ibi depositus , proindeque concretus , in minora illa abiit ligamenta : vel perichondria singulas hafce partes ambientia , immoto in fracturæ curatione genu , diu sibi proprius applicata , mutuo tandem coaluerunt , & posterioribus movendi artus tentaminibus , in singulis adhærentiæ punctis aliquam vim passa , utrinque a cartilaginibus quæque suis nonnihil elongata secesserunt , ut breves istæ perichondriorum sibi mutuo accumbentium connatæ appendiculæ fibras descriptas constituerent. Cæterum hanc ankylosis causam naturalem fatis & perspicuam inter non infrequentes reponendam censeo. Memini enim alias vidisse femoris caput par modo cum pelvis acetabulo coalitum , nec non & tali tuber cum extremæ tibiæ sinu , ossaque carpi cum ulna & radio. Hujusmodi ankylosis ex *Reimaro* mentionem facit *Morgagni* (1) ; nec absimilis fuisse videtur illa ab Ill. *Flajano* tradita , in qua nempe omnes articuli genu partes firmissime , & undique adhærentes repertæ sunt (2).

Post hæc incidi in cadaver viri circiter trigonarii , cuius genu sinistrum tumidum erat , &

(1) Epist. 69. n. 12.

(2) Nuovo metodo di medicare alcune malattie spettanti alla chirurgia. Dissertazione terza.

nonnihil flexum. Anchylösia etiam incompletam hic adesse comperiebam , cum aliquibus flexionis, & extensionis motibus pertentatis , insuperabili ab ostaculo brevissimum illi ad spatium redigerentur. Dissecto genu , rotulam inveni immediate , & solidissime accretam condylo femoris externo , cuius præcipue accretionis causa immobilis fere articulus evaserat. Etenim rotula paullo superius ad condylum fixa , deorsum gliscere , sicuti ad flexionem opus est , non poterat ; neque completam extensionem minus impiebat , cum sursum se non retraheret , hinc ad primos extensionis conatus , inferiori suo apice ultra condyla exorrecto , in eam tibiæ partem impingebat , quæ post rotulæ ipsius ligamentum posita est , proindeque insignem ibi foveolam , nova quadam cartilagine obductam , insculperat. Præter hæc , patefacto articuli cavo , quamplurima apparuere candidissima filamenta , condylorum femoris & tibiæ , nec non cartilaginum semilunarium facies , utrinque mutuo accumbentes , laxe nectentia. Ex iis alia erant perpendicularia , obliqua alia , pleraque tertiuscula , nonnulla aliquantulum lata , omnia vero teneriora , & cohærentiæ fere mucosæ , ut merito dubitem , vix ea potuisse longo licet tempore duritiem adipisci , quam in aliis anchyloseos

vinculis nobis exhibuere. Suspicio aliqua potius cum hæc vidissim , in mentem venit , an hujusmodi filamenta nata essent ex lentiori quadam cartilaginis non amplius attritæ spontanea veluti deliquescentia. Hoc enim pathologicæ observationes ostendere videntur , cartilagineas articulorum crustas fere prorsus evanescere , quotiescumque luxato , aut 'alio quovis modo vitiato articulo , non amplius invicem atterantur : & e contra cartilaginosum quidpiam iis in locis noviter efformari ; ubi novus ossium attritus inducatur.

Jam vero asymmetricorum morborum ordinem resumentes , ad annosa tibiarum ulcera convertimur , quæ crus sinistrum saepius obsidere , in iis praesertim contendo , qui , ut saepe fit , lienis obstructione laborant. Lienoso cuidam a fortuito lapsu utriusque tibiæ anterior cutis eodem fere modo abrasa est , & contusa. Negligit æger levissimum vitium , a quo crus dextrum brevi & sponte sanatur , at in sinistro ulcus oritur sphæricum , Fordidum , purulentum. Alios vidi plurimos , quibus dum nulla , aut pauca , eaque prorsus benigna ulcuscula aderant in tibia dextera , putridum simul , & gangrenosum ulcus sinistrum misere depascebatur. Evidem cachexia illa , quæ a lienis obstructione inducitur , potest , quod in scorbuto toties observamus , ulcera in tibiis exci-

tare. Cur tamen in sinistra frequentius? Videtur lien mole auctum, dum ad ilia usque elongatum descendit, lymphaticas venas, forte & sanguineas premere posse, & hinc sanguinis in lævo crure impetum retardare, ex quo facilius ægrotet. Neque absconum foret colon pariter intestinum ob pressionem aliquam, quam forte in sinistra exerceat iliaca vasa, nonnihil incusare. Confirmatur aliquomodo hæc conjectura ex singulari quadam *Swietenii* observatione, qui gangrenam in crure sinistro mox imminentem, mire vidit evanuisse, cum æger plurimos flatus, summo cum impetu, & maxime sonoros explosisset (1).

Viri lienosi, & ulcus in crure sinistro jamdiu gerentis, cum anatomien instituissem, cruralem venam quatuor transversos digitos infra Poupartii ligamentum fere occlusam reperi ab alba, solidiorique substantia, quæ ad instar fungosæ excrescentiæ ex interna canalis membrana producebatur. Sed hujusmodi vitium in hisce speciebus semel haec-  
nus vidi.

Alias ob oculos venit foeminæ cadaver cui dextrum crus magno ædemate tumidum erat, fere nihil sinistrum. In hujus porro differentiæ causam inquirens, dexteram inveni cruralem venam duram, nodis inæqualem, colore fusco, quo

ambientem etiam cellulofam telam infecerat: ea aperta, multi compactique grumi per totam longitudinem visebantur, membranæ interiori ita hic illic adhærentes, ut variis in locis tota venæ cavitas ab ipsis obstrueretur. In horum intervallis subcorruptum & fuscum cruoſis colliquamentum latebat, quod perspiratione, opinor, insensibili extimas venæ tunicas cum viciniis inficiebat. Totum hoc vitium ad tibiales quoque venas protendebatur.

Putidissimum scortum, ex pedis dimidiique cruris dextri necroſi, nostro obiit in nosocomio. Hujus in femore vasorum nervorumque fasciculus a rigidissima & callofa cellulositate implicatissimo nexu ſtipatus erat; atque ubi cruralia vasa sub inguinali arcu decurrunt, durities major erat, & arteria in tuberculum prominere vifebatur, quo ſecto, ichoris aliquid cinerei purulenti effluxit; fed tota cavitas molli quadam, ulcerosa, & farcomatofa fere tunicarum vegetatione ita infarta erat, ut ſpecillum ab iliaca deductum detineret. Arteriæ curſum inde ſequentes, anguſtiffimam illam, & exanguem, non fecus ac venam videbamus: argumento ſcilicet interceptæ in hoc artu ſanguinis circulationis, ex quo credibile eſt, gangrenæ cauſam extitiffe. Pejoris ergo notæ arteriarum obſtructiones, quam venarum viden-

tur ; & utrarumque vitia ad crurum morbos aliquid subinde conferre.

Ad asymmetriam nostram , etsi minus proprie , patellæ etiam placet luxationem referre. Scilicet os istud , genu in anteriori parte venuste explens , ad latus externum æque ac internum gliscere in luxationibus tradunt ; quascunque tamen hactenus viderim , quæ plurimæ sunt , exteriore omnes fuere. Quamobrem nullus dubito , quin rotula hac versus longe facilius excurrat. Neque aliter ob articuli formam res esse potest. Siquidem rotula non in medio accurate genu sita est , sed ad latus externum nonnihil vergit , & majoris sua parte exteriori applicatur femoris condylo , qui deinde minor est , & complanato latere propriorem , aptamque luxatæ patellæ fistit sedem. Hisce addi potest majus vasti externi robur , nec non obliqua aliquantulum ligamenti rotulæ in tibiam insertio. Cæterum luxationes rotulæ sèpius in valgis rachiticis observavi , a ligamentorum procul dubio laxitate , & prava ossium figura enatam , in iisque folet in utroque genu coexistere. Valgitas præterea quædam , vel absque rachitico vitio , induci ab ipsamet rotulæ luxatione , extra locum diu relicta videtur. Genua enim in caderibus cæteroquin optime conformatis plerumque notavi , una cum rotulæ luxatione , fuisse

introrsum distorta ; quid quod ad evidentiam fere perducta res erat in duobus , præ cæteris , exemplis , quæ valgitatis vitium in unico genu ostendebant , quod luxationi fuerat obnoxium . Neque , ut mea fert opinio , id mirum alicui esse debet . Cum enim per rotulæ luxationem , ligamenti ejus ad tibiam insigniter mutetur directio , juxta quam musculi crus extendentes actionem exerunt suam , hinc musculi ipsi imperfectam operantur extensionem , non sine continuo quodam deductionis conatu , a quo sensim tibia extrorsum inclinetur .

Liceat ultimo asymmetricis morbis addere egregii *Levreti* observatum , qui ex viginti infantibus , obliquo situ in utero positis , vix unum reperit ad lœvam inclinatum ( 1 ). Alterum vero Cl. *Peu* , qui cellulas illas , ab utero circa obliquam placeatam contracto efformatas , sæpiissime in latere dextro , rarius in sinistro deprehendit ( 2 ).

( 1 ) *Art des accouchem.* p. 18.

( 2 ) *Pratique des accouchem.* lib. 1. cap. 4.

---

## LÆSIONES CAPITIS.

**A** Capitis læsionibus suppurationes sæpe sub crano oriuntur, quæ lento gressu succrescentes, fatum minantur. Raro quidem illæ in ipsa cerebri substantia latent; quoties autem id factum vidi, vidi etiam ægros diu plerumque ab ictu vixisse, & omnes fere epilepticis accessibus obnoxios occubuisse. Frequentiores sunt quæ crano & duræ matri, vel huic & piæ interponuntur. Paucis utrasque perstringam, ut ex simillimorum vitiorum comparatione discrimina nonnulla eluceant, a præxi eruenda.

Primum suppurationis genus vix dubitandum est, validam pro causa habere ossis contusionem, a qua fit, ut ejus fibræ ad violentam oscillationem percitæ, communia, & sibi nexa pericranii, duræque matris vascula lædant: genus alterum ex cerebri ipsius concussione suboriri suspicor. Scilicet in gravioribus ictibus, aliquando vero & in levibus cerebrum nonnihil exagitari videtur, quæ exagitatio, ob naturalem partium structuram, a cerebro ipso, & tenui meninge illi arctissime circumducta nihil egreditur, sed illud dimovet

dimovet in biloculari cavitate, falcis ope bipartita; inde intermeningeis vasis vis quædam interfertur, quæ ideo distrahi possunt, vel disrupti, non secus ac, cranio contuso, vascula illa laeduntur, quæ ipsi, & duræ matri intercedunt. Distinctio ista aliquam proponendis mox rebus lucem commodabit, & ab iis vicissim mutuabitur.

I. Observatum est, pericranium ab osse sponte secedere, craniique superficiem colore mutari atque arescere, quoties ex capitis vulneribus interior inflammatio, & quæ sæpe sequitur, suppurationis circa meninges fieret; idque præ cæteris sollicite notavit Cl. *Pott* (1), & ad vitii interioris diagnosin magni fecit. Ego autem vera hæc quidem comperi, ubi vitium inter duram matrem, & cranium adesset, sed frustra fateor eadem quæsiisse, quotiescumque suppurationis inter duram, & piam matrem delitesceret. Vidi e contra duram tunc meningem, & pericranium ipsum integro adhuc cranio undique adhærere. Quamobrem verius opinor esse statuendum, spontaneam, successivamque pericranii separationem, colorisque in osse mutationem, vitium strictius indicare, cranio immediate suppositum, duræque matris ab interna ejus facie separationem:

(1) Œuvres chir. tom. 1. Lésion de tête, sect. 2.

neque hujusmodi expectanda esse phænomena , ubi sub dura matre morbus hærent , superstite ejus nexus cum cranio.

II. Suppurationes intermeningeæ solent per totum fere alterutrius cerebri hemisphærii ambitum diffundi, & majorem plerumque obtainere extensionem, quam quæ cranio immediate subjacent (1); ex quo fit ut , cæteris paribus , lethaliores etiam evadant.

III. Valida cranii percussio necessaria videtur ad suppurationem sub eo excitandam ; sed ad illam quæ inter utramque meningem fit, leviuscula fortasse sufficit capitis contusio (2), immo & remota quælibet a capite violentia , a qua cerebrum concutiatur.

IV. Suppurationes , quæ fiunt inter duram matrem , & cranium , fere semper sub ipsomet percussionis loco deprehendi solent ; quæ vero inter meninges , in aliis etiam partibus , ab externo læsionis loco remotis , quandoque observantur ; adeo ut , si , ex. gr., percutiatur caput in alterutro ejus latere, intermeningea suppuratione non raro in opposita parte inveniatur, quemadmodum & in sanguinis effusionibus idem obtainere

(1) Idem notat Cl. Haselberg. de capit. læsion. trepan. exigent. Goetting. 1785.

(2) Cujusmodi fuisse videtur pulchræ Nerii filiæ infortunium apud Hippocr. de morb. vulg. lib. 5. n. 50.

verum est. An capite a dextris percusso, hemisphæriis cerebri ad oppositam partem congeneri motu propulsis, dextrum eorum cedenti falci occurrens, minus inde laceſſitur, quam ſinistrum, quod in duros alterius lateris cranii parietes illiditur?

Neque vero tam facile eſſe arbitror quod *Falloppeius* innuit, percusſo nimirum capite in parte anteriori, vasa lædi in posteriore (1). Veroſimile quidem eſt, ut diximus, ſuppurationes ſub dura matre, non ſecus ac ſanguinis effuſiones a cerebri concuſſione ortum ducere. Sed concuſſio iſta, cæteris paribus, facilius quam alibi excitari videtur ab iictibus vertici lateribusque capitis illatis; nam ibi major cerebri moles lata superficie lato cranio accumbit (2): lobi e contra cerebri anteriores, cum gracili apice coronali oſſi occurrentes, ægrius poſſunt receptum ab iictu motum majori nimium cerebri maſſæ posterius coſmunicare. Atque hæc eſt fortaffe cauſa, ob quam

(1) Expositio in Libr. Hippocr. de vuln. capitil c. 14.

(2), Si a vertice ad basin cerebri altitudinem emetiaris, hac in parte maximam invenies: ſimul vero iſte lobus posterior in utroque latere dilatatus cerebri volumen hac in parte adeo amplum reddit, ut & cranium iſum hac in parte latiſſimum apparet. (Sc̄mering. de basi Enceph.

Et cerebrum hac capitil parte (ſincipite) plurimum ſubeft (Hippocr. de cap. vuln.

læsiones in fronte receptæ, paullo minus inferre  
discrimen videantur, quod Cl. *Pott* non teme-  
re, ut opinor, suspicatus est (1). Cum nobilis-  
simæ familiæ puer à lapsu satis graviter in fronte  
læsus fuisset; Matrona quædam annosa sollicitam  
matrem irridebat, quod eum chirurgis curandum  
tradidisset, negans ullum unquam in læsionibus  
frontis adesse periculum. Lata nimis est propositio,  
non omni tamen caret veritate. Quoties enim  
irrequieti pueri humo frontem impune allidunt?  
Magnam certe hominum partem videmus inde  
aliquam in fronte cicatricem gerere. Quanquam  
reticenda hic non est *Faloppii* sententia, qui hac  
de re sic loquitur: *Quod datis duobus vulneribus,*  
*in anteriori altero, in posteriori altero capit is*  
*parte, homo citius liberatur in posteriori ictus,*  
*quam in anteriori sede, nemo audeat hoc negare,*  
*verum etenim est, atque hoc millies expertus sum*  
*in praxi* (2). Tanti viri tam firma assertio fieri  
non potest, quin aliquam veritatem recondat.  
Sed quomodo hæc concilies cum Ill. *Pottii*  
opinione non minus fortasse veritati consentanea;  
Conciliabis, opinor, si ponas, in pronuncianda  
læsionum frontis prognosi, interiorum noxarum  
periculum *Pottium* respexisse, *Faloppium* vero

(1) Loc. cit. pag. 143.

(2) Loc. cit. cap. 10.

plus minusve promptam externi vulneris sanationem. Atque equidem mihi etiam videor nonnullam facilioris sanationis differentiam inter frontis, & reliquæ capillitii cutis vulnera deprehendisse. Major fortasse integumentorum in fronte mobilitas, atque tenuitas alicui sunt impedimento. Memoriæ adsunt peculiaria exempla quædam chirurgorum patientiam provocantia, hominum scilicet in fronte vulneratorum, quibus optime cæteroquin se habentibus cicatrix tamen absque ulla conspicua causa ægre admodum, tardeque vulneri innascebatur.

Restat nunc ut ad superiorum animadversiorum confirmationem facta quædam in medium proferam, a quibus quo eæ proprie spectent, luculentius appareat.

Adolescens rusticus, annos natus 17., uvas noctu ex alieno vineto surripiens, a custode deprehensus fuit, validoque scipione percussus; mox ab ictu humi prostratus, momento post sponte surrexit, iterum confusa mente lapsurus. Postera die ad nosocomium delatus est. Vulnus incipit a superiori & dextra frontis parte, & duos fere pollices longum inde posterius ad proximam extenditur parietalis ossis regionem. Eo nonnihil dilatato, cranium fractum apparet, cuius plura minora fragmenta insigniter depressa,

& in duram meningem fortiter impacta, nequeunt magna fine vi attolli; quocirca ut sunt relinquentur. Æger interim mentis compos, fatis bene se habet. 1. die semel. 2. vero ter ei sanguis emittitur ex brachiis, credo & ex pedibus. 4. exteriora ossis frustula spathulæ ope avelluntur, superstite adhuc non minima interioris tabulæ portione, quæ & ipsa. 6. tandem die cedit. Dura mater patulo fatis hiatu detecta conspicitur; ejus deinde superficies albescit, & purulenta fit; suppuration bona toto in vulnere commendatur, cunctaque bene cedentia, sanitatem ægro promittunt. Verum 11. die febris eum corripit valida, cum rigore atque horripilatione. 12. apparet erysipelas in fronte, & oculi dextri palpebris: horripilationes subinde leves vagæque redeunt; æger fit somniculosus. 13. erysipelas ad oculum sinistrum & ad genas propagatur; vulneris labia decolora, pus tenui manantia; pericranium circa vulnus, in inferiori speciatim parte, ab osse solvitur; cutis arida; calor acris. 15. Pulsus parvus, frequentissimus, æger clausis plerumque oculis per lectum se jactitans, brachium dextrum, jam iners redditum, sinistri ope sustentat. 16. Cutis cum adiata non nihil flavescit; dejectiones plurimæ, liquidæ, nigricantes; sopor altus. 17. fatis cedit. Sectione instituta, pericra-

nium circa vulnus, & ab eo usque ad orbitam dextram ab osse separatum apparet, ita ut dimidia fere coronalis pars, idque a dextris, denudata omnino sit. Sub palpebra dextra, & superiori orbitæ parte, puris copia latet; in palpebra etiam sinistra suppuratio adest, absque ulla tamen ossis denudatione. In reliquis capitinis partibus integumenta communia, & pericranium naturaliter se habent, crano ubique adhærentia. Crano ipso resecto, dura mater naturalem cum ossibus nexum servabat ubique, si loca demas, quæ pericranio subjacent exterius separato, nimirum dextram ossis frontis partem, & orbitam ejusdem lateris, a quibus ipsa secesserat. Nullus hic tamen subfudit humor, qui morbo progrediente, per fracti cranii hiatum, liberum satis exitum habuerat. In pia matre, & cerebri parte fracturæ supposita, vitium arguitur nullum, parva quadam excepta in cerebri superficie fugellatione, quam a prima fragmentorum intropressione non immerito repeatas. Ubi vero ad sinistram ventum est, magna inveniebatur puris copia, quæ totam hemisphærii sinistri cerebri convexam superficiem alluens, ad mediam usque cranii fossam pertingebat. Ampla hæc suppuratio erat meningibus interposita, absque ulla tamen earum erosione, ut sana adhuc extima duræ matris facies naturaliter ossibus

adhæreret, piaque meninx illæsum cerebrum obtegeret. Sectione ad reliquas cadaveris partes perducta, in abdomen hepar sanum videbatur; bilis copia turgebat vessicula, pustula quædam purulenta in lienis superficie conspiciebatur. Denique pulmones in pectore optime se habere videbantur; sed accuratius eos undique perlustrans, parvum offendit abscessum in sinistri pulmonis postica parte, nucis magnitudinem æquantem, & albo pure refertum.

Apparent ex hoc exemplo eorum pleraque, quæ de suppurationibus a capitis vulnere enascen-tibus initio proposueram. Duo quippe, a se invicem discreta, hic aderant vitia, separatio scilicet duræ matris a cranio per amplam satis aream in eodem vulneris latere; prætereaque maxima in opposita parte suppuratio, meningibus interposita. Pericranium quidem ab osse secedens, & ossis vitium oculis confaciendum, suppositæ duræ matris a cranio separationem utcunque indicaverant: suppuratio vero sinistri lateris nullis omnino topicis, a quibus dignosci posset, indiciis sociata fuerat, nisi huc signum referas nimis tardum, quod ab hemiplegia dextra desumi potuisset.

Neque est cur pustulam illam in liene reper-tam, & abscessum in pulmone sinistro incuriose

prætermittas, qui ob prægressam in ægro levem auriginem, hepatis vitium, quod tamen nullum fuit, facile expectasses. Attamen non adeo rarum id est, & plurimi ex capitis vulnere subicterici pereunt, quin ullus hepatis morbus ex cadaveris sectione elucescat. Abscessus autem alibi potius quam in hepate enati, jam a nonnullis observati descriptique fuere. Rarius & singulare omnino est, quod a capitis vulnere, non ut solent, exigua, & quandoque plura in pulmonibus excitentur tubercula, sed insigne in pectoris, vel abdominis cavitate generetur empiema. Hæc tamen a *Marchetto* (1) præsertim, & *Valsalva* (2) visa sunt; & ego ipse in hujusmodi speciem incidi, cuius historiam hic referam.

Robusto homini, an. 35., in capite percusso, vulnus hæsit in parietalis sinistri regione, ad aponeuroticum capitis involucrum usque pertinens. Paucis ab infortunio horis, faciei rubor, caput dolens, temperamentum sanguineum, suadent sanguinis emissionem, quæ primum in brachio, 2. die in vena jugulari facta fuit. 4. Erysipelas vulneris ambitum obsedit, quod dein ad supercilia, aures, cervicem, & totam ad faciem quotidie increscet; copiosa oritur in

(1) Observ. medico-chir. 15.

(2) Morgagni epist. 51. n. 20.

vulnere suppuration; aponeurosis & pericranium in vulneris area cum pure diffluunt, ibique cranium nudum adparet, absque ulla conspicua coloris mutatione. Circa 12. diem erysipelas evanescit; labia vulneris, & puris qualitas in melius mutantur, æger bene se habet. 15. Febris ingruit cum rigore & frigore ad horæ dimidium; mox calor & sudor subsequuntur. 16. Perdurat febris; sanguis iterum educitur ex jugulari sinistri lateris vena, in eoque notantur minor crassamenti soliditas, color ater, serum cito turbidum & sanguinolentum, fætor promptior. Interim ægro memoria, & sensus vigint; urinæ fatis concoctæ, neque turbidæ observantur. 17. frigus, horripilatio redeunt. 19. diarrhæa accedit; vires deficiunt; æger somniculosus, vaniloquus; vulneris facies deterior fit; cranii superficies colorem subflavum ostentat, hinc inde nigricantem. 20. Hemiplegia in dextro latere, subsultus in opposito; delirium gravius; pulsus parvus, celer, irregularis; trismus vespere, deglutitio difficilis, & quæ tentata motus ciet convulsivos: loquela & sensus fere omnes pereunt; convulsiones accedunt generales, subinde redeentes. Æger diu cum tot tantisque malis misere luctatus obiit die 25. In cadavere parietalis ossis superficies periosteum denudata, & leviter erosa in vulneris

loco apparuit; alibi vero pericranium ubique ossi adnatum. Cranio ablato, nihil in dura matre morbosí se obtulit, præter parvam sedem vulneri suppositam, in quam puris aliquid per quandam ejus erosionem ex meningum interstitio erupit, ubi maximum latebat vitium. Sinistrum enim cerebri hemisphærium, pia matre adhuc obvestitum, materia undique tegebatur sublava, densa, gelatinosa, quæ ad vulneris vicinias fluidior erat, vereque purulenta. Ad sunt præterea inflammationis vestigia in cerebro universo, & ventriculus lateralis dexter consueto majorem lymphæ copiam continet. In abdomine omnia secundum naturam sunt. Pectore referato, magna deprehenditur copia serosi, vel potius purulenti humoris, subdensi, flavescentis, in dextra cavitate effusi. Pulmo item dexter in minimam molem contractus, crusta quadam gelatinosa, sero effuso concolori obducebatur, & in ejusdem substantia in primis exteriori non pauca inveniuntur variæ molis tubercula, quæ cinereo, nec foetido tamen pure scatent (1). Thoracis cavitas & pulmo sinistri lateris nil morbosí præseferunt. Jam vero ante vulnus optime sanus homo vixerat.

(1) Moderanda hinc videtur Cl. Molinelli sententia, qui partes ex capitis vulnere suppurantes tradit nunquam non ex iis esse, quæ abdomine continentur (Comment. Bonon. tom. 2.).

Qui hujusmodi abscessus a capitis læsionibus alia in corporis parte obortos, a turbata sanguinis circulatione explicare conantur, videant qui fieri possit, ut cum uterque pulmo sanguinem ex corde per communem truncum accipiat, tantus tamen in dextro morbus excitatus sit, nullus in sinistro. Longe hic felicior adhuc videtur usitissima illa, & vetus metastasis doctrina, accedente forsan nervorum imperio, aut peculiari quadam partium dispositione, in hospitio morbosæ, & a capite deerranti materiæ determinando (1). Cæterum adversum illos, qui inordinatam accusant sanguinis distributionem, acrius adhuc clamant pathologicæ observationes aliæ, quæ consimilia in hepate, vel in pulmonibus vitia ex aliarum partium læsionibus exhibuere (2).

Faber lignarius, egregie fanus, an. 32., proceræ staturæ, optimique corporis habitus, scalprum, quo ligna dedolat, ipse sibi in brachium sinistrum incaute adigens, non leviter fauciatur. Vulnus pollicem fere longum ibi inest, ubi pulsus attingimus; arteria ipsa radialis læsa est,

(1) Cl. Bertrandi notat, hepar affecto capite, quandoque in pus colliquatum fuisse, ubi nullum puris indicium vel causa prostaret; cui quidem nescio quid reponam.

(2) Molinelli loc. cit.

magna docente hæmorrhagia , quæ lineis glomeribus , aqua vulneraria romana imbutis fistitur. Redit subinde per intervalla sanguinis effluvium , eademque methodo , & strictiori vulneris deligatione compescitur. Interim cubitus & manus admodum intumescunt , cum gangrenæ metu ; quamobrem consilium initur de liganda arteria. Verum remotis 5. die ad hunc finem spleniis , inspectoque vulnere , nullus jam effluit sanguis , eo quod discissæ arteriæ lumen occlusum sit. Laxius idcirco vinculum , & cataplasma admoveatur emolliens , ut tumor subsideat. At vulnus folidum , fere gangrenosum est , & pus copiosum fætidumque manat. 8. Prodit humor ater putridissimus cum vulnus manu ad cubiti anteriorem faciem deorsum premitur. Febris insuper valida , horripilationibus intermixtis erumpit , & ægri adnata nonnihil flavescit. 10. Aurigo in oculis , & cute fit evidentior ; hypochondrium dextrum tumet , & ab attacitu dolet ; cutis ædematosæ digitæ vestigium retinet ; pulsus debilior ; sudores copiosi ; respiratio cita & laboriosa ; tabi gangrenosi ex vulnere fluxus pergit. 13. Æger moritur. Cadaveris inspectio omnes cubiti anteriores musculos ad ossa usque gangrena corruptos , arteriam radialem vere detruncatam ostendit , extremis a se invicem remotis. In abdomine

convexa hepatis facies fana est, verum in parte concava multæ adfunt maculæ nigræ, reipsa gangrenosæ, quarum una nummi latitudinem superans, hepatis substantiæ altius infidet; gangrenosa etiam flacciditas & nigredo, minus tamen profunda observatur in viciniis transitus venæ cavæ per hepatis partem posteriorem; vesicula continet aliquantulum bilis variegatæ; ventriculus aere turget; renum superficies levi phogosi notatur. In pectore pulmones plurimis scatent tuberculis, per eorum substantiam dispersis, quorum nonnulla materia imbuuntur densiori, purulenta; ex aliis vero, si discindantur, ichor manat tenuis, fuscus, & fætidus. Pars superior utriusque pulmonis lympha turget, quæ pulmone dissecto, undatim effluit. Pericardium & cor recte se habent.

Curiosum multo magis est exemplum aliud, ab egregio Medico nobis communicatum, hominis nempe in abdomen vulnerati, quem multis a vulnere diebus defunctum, cum ipse aperiret, vidit vulnus ad mesenterium penetrasse, in quo suppuratio aderat; prætereaque magnus alter abscessus dextro in pulmone.

Bajulus laboriosus tribus fere ab annis miræ molis hydrocoelem dextro in teste gerebat. Postremo sanguinis copia ex tunicæ vaginalis cavitate per solitam paracentesin eliciebatur, &

tumor tanta celeritate tantoque dolore iterum increscebat, ut ad castrationem deveniendum fuerit. Diebus insequentibus gangrenosa facie vulnus amplum sordebat; febris ingruit cum frigore diurno, & forti corporis concussione, quæ etsi corticis peruviani vi aliquantulum cesserit; æger nihilominus ex metastasi, opinor, putridi humoris ad pectus delati, viribus paullatim destitutus interiit. Nam vero in dextro pectoris cavo humorem inveni flavum, turbidum, purulentum, ad libras fere duas inter pleuram & pulmonem collectum. Pulmo iste a premente humore ad tenuem adeo molem redactus erat, ut eum magna ex parte absumptum credidisses; attamen compressus tantummodo, & intus mollis, omnique expers vitio, extimam servabat membranam undique integerrimam.

Alterum in cadavere isto vitium notabatur, scirrus nempe in abdomine, sub rene dextro ad vasorum spermaticorum originem positus, qui ab externo testis vitio prorsus distinctus, ovi gallinacei magnitudinem excedebat. Porro abdominales ejusmodi scirri non raro testis vitiis afficiantur, & prognosin nostram facile fallunt, in iis præsertim speciebus, in quibus optima exterioris funiculi spermatici constitutio securitatem quandam promittebat.

Sacerdoti cuidam scirrhosus testiculus feli-

cifflime amputabatur ; funiculus spermaticus mollis erat , & brevi vulnus sanatum est. Verum non multo post dolores in ventre , quos leviores antea æger fenserat , magis magisque succrevere ; duries inde & tumor tactu ipso percipiebatur ; & æger paucos intra menses occubuit.

Quadragenariæ fæminæ utraque mamma scirrhosa erat & durissima , simulque multa cutanea id genus tubercula per totum fere pectus dispersa apparebant ; gravis etiam dispnæa ægram vexabat , ex qua mortua est. In hujus cadavere pulmones ambo perinde ac externæ thoracis partes , scirrhis quamplurimis laborabant.

Verum interiores hujusmodi scirrhi , qui vitia exterius nata facile consequuntur , morbosī veluti regressus sunt , a lentiori quadam vitiati humoris absorptiōne progeniti ; atque hinc ad metastasim nihil attinent , quæ velociorem humorum translationem importat. De metastasi porro ipsa non nullæ mihi in promptu adnotationes sunt , quas hic coronidis loco subjiciam.

I. Visum nobis est , pulmones inter viscera frequentius metastasi vitiari , ne iis quidem speciebus exceptis , in quibus a capitis vulnere metastasis oritur.

II. Alteruter tantum pulmo plerumque afficitur , & ejus quidem lateris , in quo morbi causa residet ;

refidet ; ita ut ex ulcere , ex. gr. , cruris dextri , in dextero pulmone metaftasis fiat ; & contra.

III. Ex abscessibus adhuc clausis non tam facile humores absorbentur. Siquidem cavitatis eorum interna superficies tenaciori quadam puris amurca obduci solet , quæ abrupta vasorum oscula obstruit , tenuiorique abscessus materiæ viam præclaudit. Ubi vero abscessus aperiatur , paullo post amurca illa ob auctam suppurationem , vel ob putrefactionem ab aere inductam dissolvitur , atque hinc abstersa , & vividior facta interior abscessus area , puris absorptioni aptior fit. Evidem in hominibus ulcere gangrenoso peremptis , & in quibus alter alio in loco purulentus abscessus latitabat , pulmonem ulceri respondentem non semel vidi fusco putridoque humore , non tamen pure imbutum : argumento scilicet , ex aperto magis ulcere , quam a clauso abscessu metaftasim factam fuisse. Atque hinc intelligitur , quomodo magni sæpe , subfrigidique abscessus sine graviori noxa ferri diu queant , qui exterius aperti ægros facile in lethale discrimen adducunt ( 1 ).

IV. Denique notandum est , postremis fere vitæ diebus , subdoleque metaftases sæpe prodire , quippe quas virium infirmitas non parum juvet.

( 1 ) “ La complessione è molto più disposta a patire „ dall’ assorbimento dell’ umore vizioso , subito che le

---

*DE ALIIS CAPITIS MORBIS PAUCA.*

**C**EREBRI laterales ventriculos naturali via invicem communicare Cl. *Monrous* docet (1). Medullaris revera teniolæ , quam centrum semi-circulare geminum appellant , cursum pone sequentes , ad anteriorem pervenimus imamque ventriculorum partem , in qua ostium se pandit , ovalis figuræ , calami scriptorii capax , sub fornice & post ejus anteriora crura locatum , per quod ex uno in alterum ventriculum via patet. Similia fere docuerat jam ante *Lieutaudius* (2) , dissentiente *Portal* , qui una cum pluribus inde fortasse deceptus est , quod hujusmodi communicationem in septo lucido quæsierat , cum sub eodem , immo sub fornice quærenda fuisset. Hanc ipsam communicationem per morbum amplificatam ego facilius reperi ; insignes enim humorum in ven-

„ parti sono esposte all' aria esterna , che quando esse ne  
 „ rimangono ancora coperte , e difese ( vide Bell Institut.  
 „ di Chirurgia , cap. 9. )

(1) V. Giornale Med. di Venezia , tom. 3. pag. 7.

(2) Anat. tom. I. pag. 577.

triculis collectiones , superiores eorum partes una cum calloso corpore extenderentes , id efficere videntur , ut septo lucido sursum erecto , anterior simul fornicis angulus elevetur , latiori liberiorique hiatu subter relictio.

Puerperæ lethargo enectæ caput inspiciens , ventriculum cerebri lateralem & dextrum in primis aperii , ex quo satis magna limpidi servis erupit. Ea exhausta , in aperti ventriculi finu nova aqua scaturiebat , qua iterum dispersa , nova rursus exoriebatur. Attentius in hanc rem inquirens , humorem vidi a sinistro ventriculo , pari hydrope distento huc affluere , idque per patulum hiatum , qui sub anteriori fornicis angulo , & post anteriora ejus crura conspicue apparebat. Partes quippe illæ in arcus modum ab aquis elevatae , ita a thalamis diductæ erant , ut spatium aliquod interefset , per quod ab uno ad alterum ventriculum lata via pateret , septo lucido adhuc integro. Tertius item ventriculus copiosis aquis replebatur , atque anterior , sic dicta , cerebri apertura , quæ ad ipsum dicit , adeo erat in circulum dilatata , ut ejus diameter semipollicis esset. Thalami nervorum opticorum notabili spatio a se invicem disjuncti erant , superstite tamen , et si non parum elongato , cinereo illo funiculo , qui inter ipsos invicem diductos ap-

parere solet (1). Post hæc cerebellum perlungans, tentorium inveni in toto dextro latere pertinaciter adhærens suppositæ cuidam substantiæ, quæ a dextro pariter cerebelli ipsius lobo ortum dicit. Hujusmodi substantia fere omnem tegebat superiorem lobi superficiem, ab eaque ad inferiorem ejusdem lobi faciem descendens, medullam oblongatam attingebat, quin cum illa cohæreret. Erat autem fungiformis veluti excrescentia, quæ angusto pedunculo alte insidens substantiæ cerebelli, indeque assurgens, in latum orbem ita expandebatur, ut ejus tantum radix cerebello infereretur, magna vero ambitus pars a cerebelli, cui incumbebat, superficie prorsus esset distincta. Ejus cohæsionem duram inveni, scissilem tamen; structura evidenter, sed minutim granulosa; colore subalbicant; crassitatem vero duorum digitorum in media sui parte, tenuiorem in ambitu. Nervorum dextri lateris 5., 6., 7., 8. conjugatio morbosum hocce corpus ibi perforabant, ubi a medulla oblongata prodeentes, foramina petunt duræ matris & cranii. Ex iis par quintum strictius præ cæteris tumore irretiebatur, aliquo fortasse

(1) In cerebro hominis repentina morte correpti, omnes ejus ventriculos sanguine plenos reperi, qui ex eorum altero ad reliquos transiisse existimandum est.

ejus actionum detimento. Cæterum id vitii genus, si duritiem & faciem glandulosam respicias, scirrhosæ omnino indolis videbatur; cuiusmodi exemplum in opusculis pathologicis refert celeberrimus *Haller* (1), pluraque apud *Morgagnum* (2) conferta leguntur. Dolui tamen datum mihi non fuisse, quæ in hac foemina fortasse præcesserant, symptomatum certiore fieri. Cordi erat in primis rescire, an, & quatenus lædi potuerint actiones singulæ nervorum, quæ scirrhofo corpori adeo implicabantur. Sed pathologicarum sectionum sæpiissime ea fors est, ut vel ægri a nobis antea visi non sint, vel in grandia subinde vitia inopinantes incidamus; de quibus opportuna ex viventibus sciscitari nos fugerat.

Nosocomium nostrum adolescens petiit, quemdam tantummodo capitis dolorem, neque vero maximum accusans. Pyrexia nulla adest; plebotomia semel, vesicatorium nucæ, & remedia nonnulla a Medico præscribuntur, qui de ægroto, fatis bene cæteroquin se habente, non adeo sollicitus est. Ego interim fortuito animadvertis, ægrum identidem lentioribus oculis subattonitum circumspicere, & cum dierum 15.

(1) Observ. 1.

(2) Epist. 52. n. 26.

spatio capitis dolor nunquam recéssisset, accuratiorem instituere morbi indaginem mecum ipse decreveram, at miser noctu subita morte decessit. Cranio exsectorum, hydropem vidi in utroque cerebri laterali ventriculo: crepido illa sub anteriori fornicis angulo, quam superius descripsimus, commode conspiciebatur, ideoque ventriculi invicem communicabant. Sed majus apparuit in cerebello vitium, cuius lobi præfertim sinistri magna pars in substantiam degeneraverat a naturali longe absimilem, cinereum nempe, duriusculam, homogeneam, in qua nulla fani corticis, & medullæ species amplius supererat; locus etiam erat, ubi eadem substantia nonnihil colliquata, in subflavum & viscidulum mucum abierat. Mirum sane tantam morbi vim ad mortem usque sub mediocri cephalæa delituisse.

Anno 1783. lethale cerebelli vulnus vidimus in nostro Nosocomio, ejusque historiam, ut ægri sibi non commissi, ex ore alieno partim accepit, & cadaveris deinde sectionem nobiscum instituit Clarissimus *Palletta*, quem in hisce rebus ducem præceptoremque habuisse gloriamur, & cuius eximia erga nos merita grato pioque prosequi animo nunquam definemus. De hoc igitur exemplo illud in primis memo-

ratu dignum est, ægrum post vulnus ad undecimum usque diem vixisse; *cum paucæ adeo exempla sint vitæ post grave inflictum humano cerebello vulnus vel ad breve tempus protractæ* (1).

Is igitur, de quo agimus, adolescens erat, cui cum ensis ori inflictedus fuisset, angustum vulnus prope sinistrum labiorum angulum conspiciebatur. Mox fere a vulnera validissima febris supervenerat, una cum linguæ inflammatione, ex qua perdifficilis fiebat deglutitio: 3. & 4. die symptomata nonnihil mitescunt: 5. æger satis libere potum sumit: 6. os etiam aperit, & tunc insigne pugionis fragmentum alte infixum linguæ detegitur, idemque posterius firmiter ossibus impactum, non sine magna vi tenacula apprehensum extrahitur. Febris mox inde multo vehementior, & oculus dexter intumescit; 7. magnum accedit delirium, & suffocationis sensus, qui ægrum supine decumbentem in primis vexat, & ex quo facies intensa rubore perfunditur; brachia tremoribus convulsivis agitantur: 8. alter quoque oculus aliquantulum tumet; tota pariter facies turgida & livida appetet; lingua magis inflammata deglutitio prorsus impedita: 9. pus ex ore prodit;

(1) Morgagni epist. cit. n. 27.

æger aliquem potum sumit; sed pulsus sensim magis exiguus, & celer fit, usque ad 11. diem, quo mors eum sustulit. Paralysis in toto morbo nulla fuit, neque alia, præter quandam cervicis tensionem, peculiaria symptomata apparuere. Interim vulneris progressionem, terminumque in cadavere perlustrantes vidimusensem punctum adactum, in triangularem sinistrum labiorum musculum offendisse, dein per obvium malo omne hiatum, a secundi tertiique dentis molaris defectu ad os penetrasse, linguam oblique transfixisse, & inde posterius egressum, velo palatino a dextris perforato, ad cranii basim fuisse delatum, per quam intus penetrans, inferiorem & dextram cerebelli partem mucrone suo satis alte pupugerat. Via per quam cuspis cranium subiverat, fissura fuit, quæ inter basilarem occipitis apophysim, & petrosum processum hiat, & foramen lacerum anterius paßim nuncupatur. Ibi abscessus internus sub dura meninge factus fuerat, & puris copia sub laterali finu fortuito illæso stagnabat. Præter hæc universum cerebrum cum meningibus inflammatione affectum erat, & ferosa colluvies inter piæ matris laminas redundabat. Denique sub ipso cerebro muci inflammatorii solidioris non parum aderat, duræ matri, nervorumque principio hic illic instrati.

Nunc venio ad aliquas hemiplecticorum fectiones, quæ ad vitii sedem, quæ in cerebro est, præcipue pertinent. Perill. *Caldani* ex propriis tum observationibus, tum experimentis suspicatus est, decussationem fibrarum medullarium striato in corpore præsertim fieri, proindeque cerebri morbos hemiplegiam ut plurimum tunc excitare, quando eo pervenerint, ut hanc partem lœdant (1). Neque hinc aliena est magni auctoritas *Morgagni*, qui hemiplegiæ causam ait fere semper striato in corpore, aut in thalamo nervi optici fuisse compertam (2). Veruntamen gravissimæ tantorum virorum sententiæ observationes meæ non bene adstipulantur. Cum enim nonnulla hemiplecticorum cadavera dissecuisset, exempla plurima suppetiere, a quibus longe alia in sede cerebri labem extitisse compertum fuit, quorum aliqua hic inferam.

Vetula a dextris hemiplectica jamdiu in nosocomio decumbebat. Manus ei dextera admodum flexa erat, & ita extrorsum distorta, ut ejus vola superius, exteriusque spectaret; quod cum aliis chronicis hemiplecticis fieri soleat, Loxarthrum ab hemiplegia nuncuparem. Cœpit itaque mulier in diem languere, cibum minus

(1) Giornale cit. tom. 4. pag. 30. & seq.

(2) Epistol. 3, n. 18.

appetere, fiticulosa potum debili voce clamitare; dein sensim stupidior facta, placidam obiit mortem. Cerebro detecto, parvum ulcus reperi in summitate sinistri hemisphærii, fere in circulum expansum, fundo inæquali, subflavo, & viscidiori humore oblinitum; quod corticalem substantiam immo & medullarem ad duas circiter lineas exederat. Non ultra hosce limites vitium excurrit, & penitioribus cerebri partibus optime se habentibus, id unum genitæ hemiplegiæ accuses necesse est.

Alterum viri hemiplectici cadaver simile item ulcus in eadem ferme sede exhibuit, neque corpora striata, neque aliæ cerebri partes morbos quidpiam præ se tulerunt.

Quinquagenarius vir, qui ad eam usque ætatem ejus testimonio optime valuerat, tam frequentibus vexari cœpit epilepticis paroxysmis, ut non facile, cum ad nosocomium delatus est, eos numerasses, qui unica die iterabantur. In singulorum intervallo brachium dextrum valde torpebat, & ægre movebatur. Non multo post, morbo nihil remittente, æger in veram incidit apoplexiā, quæ vitæ finem fecit. Huic in sinistro cerebri hemisphærio, paullo supra Sylvii scissuram, insignis aderat hydatis, ovuli gallinacei magnitudinem æquans, & flavescenti turgens

lympha, quæ exili admodum membrana inclu-debatur. Sacculus iste piæ matri suberat, & extrorsum prominens, convexitatem in illa quandam excitabat; hydatidis tamen pars major cum profunda satis foveola cerebri substantiæ insculpta recondebat, circa quam aliquod cerebri ipsius colliquamentum conspicere erat. Sub ovali Vieussenii centro omnia sana appare-bant, quin immo ad idem centrum labes non-dum pervenerat.

Non tamen inficias iverim in exemplum me deinde incidisse iis simillimum, quæ a cel. *Caldano* proponuntur; ex quo didici, Cl. viri opinionem non omni veritate destitui, quamvis pro certa lege retinenda non sit.

Joannes Capellus, an. 25., nosocomium adiit die 18. Septembris 1787. Hic sæpe vino indulgens, cum superiori anno per diem largius compotasset, comitali morbo sub vespere per-cussus est, quo in posterum singulis fere mensi-bus laborare non destitit. Sex diebus antequam ad nos se conferret, a novissimo paroxysmo spasmus ei clonicus supervenerat, ex quo terna ferme unaquaque arteriæ pulsatione brachium sinistrum regulariter agitabatur, & a pectore retractum momentaneo motu nonnihil attolle-batur; caput etiam eodem tempore cum visibili muscilorum contractione sinistrorsum sese tor-

quebat. Cæterum æger nihil queritur cibum appetit; sensibus omnibus tum internis valet, tum etiam externis. Remedia validiora hic fuere, v. f., ustiones satis profundæ in sinistra cervicis, & in interna brachii parte, quas Ill. *Riboli* noſter eadem prima die instituebat; tum internus moschi uſus, liquoris anodynī &c. Non tamen ab his vinci morbus paſſus est. Etenim novi, & frequentiores sensim rediere epileptici paroxysmi; accessit febris, tum dolores primum in cruribus, deinde ad scapulas, & costas circa cordis scrobiculum moleſti. Denique die 27. universi corporis concuſſiones; respiratio admodum ſtertorofa; facies livida, & ægri ſub vesperum interitus. Detracto cranio, attentionem protinus ad ſe meninges revocabant a venarum turgeſcentia omnino lividæ; hinc ad cerebrum deveſtientes, cum anteriores ejus lobos nonnihil ſublevaremus, pars quædam albicans prope *Sylvii* ſcissuram, ſub iſpis utrinque in conſpectum venit, a qua per ſectionem vidimus duo corpora initium ducere, quæ inde affurgentia, in penitiōri cerebri ſubſtantia altius recondebantur, & finiſtrum quidem ſtriato corpori propius accedebat, dextrum autem per longiorem & aduncum apicem in dextero profunde figebatur. Hinc patet cur ex laudati viri principiis ſinif-

trum modo brachium affectum fuerit. Quod vero attinet ad corporum illorum naturam, observatum a nobis fuit, sacculos ea fuisse, membrana forti undique conclusos, & gypsea, albida, & arenosa substantia intus refertos.

*QUÆDAM DE BRONCHOCELE.*

**Q**UI glandulæ thyroideæ anatomen solertissime excoluit, immortalis *Morgagni*, multa quoque de frequentibus ejusdem vitiis, & præclara protulit. In hanc rem cum tanti viri non æquis passibus vestigia legerem, & uberrima suppeteret observandi copia, nonnullæ mihi sese obtulerunt animadversiones, quas breviter hic proponam.

Cadaver olim nactus sum, colli a dextris quam maxime tumidi, idque ob scirrhosum, ex hoc præsertim latere mole auctum, thyroidis lobum. Mutationes quæ tracheæ & laryngi a bronchocele aliquando contingunt, spectabili concursu fere huic omnes aderant. Etenim tracheæ portio, quæ inter laryngem & sternum in media colli parte decurrit, a sua sede admodum dimota, sinistrorum ita inclinabat, ut insignem arcum efficeret. Scutatæ cartilaginis ala dextra introrsum compressa, & longe minus ab altera divergens laryngem angustabat. Larynx ipsa ubi asperæ arteriæ alligatur, in angulum flectebatur obtusum, & a sinistris spectantem. Hujus insuper cartilaginea segmenta, utrinque a pressione complanata, posticæ

partis extremis ad se mutuo accendentibus, vitiatam canalis sectionem in rimam oblongam, & glotidi similem mutaverant. Tandem morbosæ glandulæ appendix una, deorsum producta, subclaviæ venæ sinistræ, & aortæ sese interpolauerat; insignior altera post tracheam reflexa, eam inter & æsophagum sese insinuaverat, donec ad sinistrum glandulæ lobum pertingeret. Inde fiebat, ut continuata glandulæ substantia anuli specie tracheam undique complecteretur.

In altero fœminæ cadavere paullo major glandulæ pars, simili fere modo posterius exorrecta dextrum æsophagi latus attigit, & membranosam tracheæ partem cartilaginibus destitutam, proindeque facile cedentem, antrorsum adeo impulit, ut in ejus cavitate non parum convexa prominaret.

Ergo & a posteriori sua parte trachea compri-mi potest a thyroide tumefacta, licet plerumque a lateribus id tantum efficiant utrinque accum-bentes glandulæ lobi. Quandoque etiam vidi fere omne thyroidis incrementum isthmo medio contigisse, & tunc trachea anterius compressa, quadratam ut plurimum formam recipiebat. Nec satis tutum a bronchocele esse æsophagum obser-vationes eadem satis probant. Vidi equidem ex bronchocele deglutitionis difficultatem aliquando fuisse productam.

Ad singulares autem vitii propagationes facilius intelligendas prætereuinda non est glandulæ productio illa, quæ in priori exemplo ad sumnum usque pectus inter vasa ferebatur. Huic enim similis altera paullo anterior non raro occurrit, sub sterno scilicet inter mediastini laminas descendens, quæ exiguo & exsucce glandulofo corpori, seu thymi reliquiis adhæret.

In fœmina, cui aliquos ante menses ex bronchocele suppurato finuofum adhuc angustumque ulcus in collo supererat, vidi suppurationem inter glandulam, & exterius ejusdem cellulosum involucrum delituisse, atque ex collo finuofum abscessum in medium usque pectus descendisse, ubi post pericardium, inter tracheæ bifurcationem, & pulmonalem arteriam desinebat; neque vero puris aliquid in alterutram pectoris cavitatem pervenerat.

Virilis ætatis rusticus, prægrandi affectus bronchocele, ex febrentium valetudinario ad chirurgicum translatus est die 12. Januarii 1785. Ægri conditio pessima pulsus deficiens, facies collapsa, respiratio anhela cum manifesta dia phragmatis, & intercostalium muscularum contractione. Bronchocele autem cum primum a nobis inspiceretur, ita subsederat, ut luculenter evacuatum fuisse abscessum constaret. Itaque ambiguum

a flaccidi tumoris residua supra asperam arteriam pressione, an a graviori potius morbo intus hærente anhelatio suboriretur. Sed tantus erat stertor, tantus languor atque debilitas, ut æger proxima nocte animam efflaverit. Igitur obscuram morbi causam investigaturi, colli primum integumenta detraximus, & mox insignis amplitudinis tumor se obtulit, a larynge ad sternum, indeque ad utrumque sterno-mastoideum pertinens, immo latius sub his musculis productus, hinc ad utrasque venas jugulares internas, illinc ante trachæm ad subclavias venas descendens, quibus mole sua non parvo erat impedimento. Binas præterea ex hoc loco appendices emittebat, alteram retrorsum inter tracheam & subclaviam venam sinistram; alteram paullo majorem inter eandem venam, & os superius sterni ad laminas mediastini permeantem, ubi glanduloſo & duriori corpori, quod thymus videbatur, tum etiam supremæ sedi pericardii pertinaciter affigebatur. Porro tumor ifte in inferiori gutturis parte mollior erat, durior in superiori, & cum inæqualitate tuberosus, ibique a binis veluti glandulosis corporibus haud adeo compactis, & secundum laringis ima latera positis exordium capiebat. Glandulosa quæ diximus, corpora, si situm & habitum respexisses, glandulæ thyroideæ.

lobos nuncupasses, tametsi isthmus, seu productio,  
qua in unam glandulam colligantur, suppuratione  
fuisse absumptus. His subjectæ conjunctæque duæ  
rursus visebantur majores glandulæ, atque mor-  
bosæ, quarum dextera partim ab osseis, & carti-  
lagineis concretionibus durissima erat, partim  
ob cuniculos, quibus passim scatebat, sanie  
redundantes, mollis atque compressilis, sinistra  
vero per totum excavata, & pure onusta, cum  
purulento reliqui tumoris facco communicabat.  
Sacci ipsius parietes tunicis constabant crassiori-  
bus, ob circumstantem cellulosam firmius resi-  
stentibus, & undequaque in se clausi videbantur,  
si appendicem excipias, quæ inter mediastini  
laminas anterius se demittebat. Sinistra porro  
mediastini lamina post sternum, & prope carti-  
laginem supremæ costæ, tenui foramine cerneba-  
tur pertusa, quod latum digitum a phrenico  
nervo subtus excurrente distabat, & per quod  
pus in lœvam pectoris cavitatem extillans, cum  
lymphæ ibi stagnantis copia miscebatur. In dex-  
tera pectoris cavitate nil vitii repertum est;  
pericardium aqua distentum; cor grandius; pul-  
mones sani. Etiamsi vero unicum foraminulum  
adfuisse in mediastini lamina dixerim, an trachea  
tamen illæsa permanferit, affirmare non ausim.  
Nam tumoris facco cum illa detracto, quam

statim incidi, laryngem & totum tracheæ ductum, & bronchos puriformi materia perfusos conspexi, intimam vero harum partium membranam inflammatam. Sed attentius in rem inquirenti, anterior dumtaxat tracheæ pars inflammata visa est, & in toto ejus ductu nullibi ita læsa fuerat, ut pus ex bronchocele traducere posset. Quare suspicatus sum, tracheam ab incumbente tumore inflammationem contraxisse, & suppurantes ejus folliculos intra suam cavitatem effudisse, quæ altera citæ mortis causa extiterit.

Observationem hanc debemus Cl. *Pallettæ*, quocum sectionem cadaveris instituimus, & rarissimum exhibet nati a bronchocele empyematis exemplum. Est etiam in hoc quod mireris, tracheam abscessui tam adhærenti, & tam producto imperviam fuisse. Sed alias quoque videre contigit, quam parum facile sit, tracheam a puris erosione perforari.

Pessimum colli ulcus in viri cadavere perlustrans, thyroidem glandulam a gangrenosa putredine propemodum absumptam observabam. Corruptio denudatam tracheam vix non undique circumserpebat, immo nonnullos videre erat ex ejus cartilagineis anulis a viciniis solutos, carie quadam nigrescentes, atque abrasos. Ipsamet interior membrana extimam sui faciem atro colore

foedatam , nec non , ulcerofam exhibebat. Attamen crassiuscula adhuc & integra canalis cavitatem a minitante gravi vitio egregie tuebatur.

Quamobrem hisce inhærens observationibus, humorem in historia mox proponenda per os rejectum , verius censeo in pharyngem ad offis hyoidis vicinias , quam in asperam arteriam erupisse.

Villico quadragenario , cui glandula thyroidea jamdiu grandiuscula erat , colli tumor inflammatus sensim increvit. Duabus fere elapsis hebdomadis , nosocomium ingresso emollientia applicantur. Cellulosam telam a dextris præsertim glandulæ adjacentem , coagmentatam & infarctam tactu percipiebam ; leviuscula aderat dispnoea. Post quatriduum subita , non sine aliquo suffocationis sensu , tussis excitatur , qua puris aliquot unciæ affatim ex ore ejiciuntur. Tumor exinde paullatim subsidet ; æger melius se habet , & purulenta expuitione pedetentim minuta , fere sanus evasit.

Quod porro ab hujusmodi abscessu trachea non fuerit pertusa , alterum inde sumi potest argumentum , quod nullum in collo emphysema apparuit. Quanquam , si verum fatear , hæc thyroidis emphysemata , bronchocelem ventosam constituentia , non multum obvia sunt , & hactenus quidem nullum memini certum ejusmodi

exemplum offendisse. Omnes, quas vidi, thyroidis intumescentiae vel ab ipsa glandulae substantia tumefacta oriebantur, vel veri nominis scirrum praes se ferebant, vel mirae varietatis humores continebant; aliquando vero lapideas, osseas, cartilagineas concretiones. Quin etiam grandiores illae, molles, & quasi inflatae strumae, in quibus faltem verum aerem latitare *Hallerus* ipse suspicabatur (1), quantum quidem mihi explorare fas fuit, vero nequaquam aere turgebant, sed aut thyroidis magnitudo sine ulla duritie sic increverat, quemadmodum hepar in rachiticis, lien in paludum incolis sine scirrho saepissime increscunt; aut humores in glandula collecti, nec eam tamen sua copia admodum distendentes, aeris compressibilitatem, aut vacuitatem quandam mentiri videbantur. Hinc valde dubito, an subiti tumores illi, qui a parturientium collo emicant, ab aere revera in thyroidem erumpente efficiantur, non vero potius a sanguine cum immanni pressura glandulam urgente, qui vasis ideo dilatatis, aut ruptis, in ejus substantiam effundatur. Cui quidem opinioni egregie congruit fluidus crux aut concretus in thyroide tumefacta frequentissime occurrens.

Quod vero attinet ad osseas illas aut lapideas,

(1) Opusc. pathol. obs. 6.

quas supra memorabam, thyroidis concretiones nullum plerumque opinor ab iis damnum inferri. Etenim aut glandulæ substantia, qua ipsis applicatur, callosa ut plurimum, & omni fere sensu expers est; vel concretus humor ejusmodi ossiculis circumductus, opportune arcet sanæ partis attritum. Non tamen hæc perpetua esse possunt: ubi enim, suppuratione in glandula enata, callositates illæ, aut humorum coagula dissolvantur, tunc quæ aspera esse solet, & spinosa ossiculorum superficies glandulæ parietes immediato attactu lacerat. Qua quidem in specie corpora nocua, nec ullibi adhærentia, ubi prius explorata fuerint, gutturali veluti lithotome tuto eximi possunt.

Viro ann. 50., fistula in dextra colli parte, ad thyroidem subiens, jam ab annis hiabat viginti. Scilicet veteri bronchoceli superveniens inflammatio suppurationem fecerat, quæ sponte per cutim erupta, perenne ibi ulcus post se reliquerat. Huic purulenti humoris fluxui tot per annos continuato, nonnullæ postremis temporibus intercurrentes additæ sunt hæmorrhagiæ, & demum a continuo fere cruenti ichoris stillicidio miser pene exhaustus, languens, & brevi moriturus nosocomium adiit. Secto cadavere, vidi fistulæ ductum in dextrum thyroideæ glandulæ lobum definere, cuius extremum dumtaxat

involutum supererat, ulcerosam cavitatem occludens, interiori nempe substantia per suppurationem diurnam prorsus delecta. Cavitas ista lapideum corpus, irregularis figuræ, & spinis aculeisque horridum recipiebat, quod undique a glandula solutum, patefacto fistulæ orificio, facili negotio eduxi. Ergo & ægro viventi extrahi idem calculus poterat, proptereaque ulceroso thyroidis vitio, & inde ortis vasculorum hic perrepresentantium læsionibus obviam ire licuisset. In ipso met cadavere sinister glandulæ lobus mole auctus & durissimus, alteram paullo minorem, sed æque lapideam concretionem in se cludebat, quæ tamen flava quadam, & callosa carne obducta, nil glandulæ fuerat detrimento.

In sinistro mulieris carpo, qui a veteri nefcio quo vitio maxima ex parte consumptus erat, & cicatricibus undique obsitus, tria cariosorum ossium fragmentula, totidem facculis membranosis inclusa reperi, quæ olim ex carie in loco relicta, quamvis emortua, inæqualia, & ab omni nexu soluta essent, ulceris tamen sanationem non prohibuerant, neque ullam in posterum noxam intulerant. Scilicet a facculis illis undeque ambiebantur, qui procul dubio a periosteo integra olim officula obvestiente derivati fuerant,

indeque duriores callosique facti , nullam pati ex corpusculis intus hærentibus læsionem poterant.

Senex ex febrientibus strumam gerebat a sinistris , quæ progrediente præcipuo morbo inflammata , in abscessum vergit. Hoc quidem non infrequens est , bronchoceles scilicet sub aliorum morborum periodo , si præsertim ad finem properent , dolores ciere , & in abscessum nonnunquam solvi. Ubi suppuratio nostro in ægro perfecta fuit , aperiebatur abscessus , & præter illam puris copiam , quæ ex propria glandulæ cavitate prodiisse conjici poterat , nova adhuc inferius ad claviculæ vicinias fursum digitis premendo eliciebatur ; durities insuper aliqua erat in axillæ cavo , & totum brachium sinistrum oedemate tumebat , cum dextrum siccum esset. Non multo post ægri mors copiam fecit in hanc rem inquirendi ; & primum quoad thyroidis vitium , reperi sinistrum ejus lobum omnino suppuratum , cavum & vacuum ; deinde ex eo scirrhosam vidi duritiem deorsum sub clavicula ad axillam usque productam , quæ vasibus axillaribus intermixta , tum impedimento esse potuerat liberiori sanguinis motui , tum oedematosæ brachii intumescentiæ ansam præbuuisse ; idque eo facilius quod callosa simul , & compacta cellulosa illa erat , quæ per

omnem humeri longitudinem vasa comitatur. Cæterum quisque videt extrinsecum thyroidi glandulæ vitium hoc fuisse, eique tantum fortuita quadam additione referendum. Cujusmodi sunt suppurationes etiam, quæ circa bronchocelem sub integumentis interdum fiunt, & postquam apertæ, & dein persanatae fuerint, vix ac ne vix quidem primariam imminuunt guttulis molem.

Animadversione dignum est, quod pleraque thyroidis vitia in ejus centro fieri soleant, sana interim, aut non multum de genere exteriori glandulæ substantia. Quamobrem pure, sanguine, aut lympha intus collectis, cavi facci formam ut plurimum refert. Globosam & ingentem bronchocelem me vidisse memini, ex qua cultro perforata, veluti ex utriculo, lympha profiliebat. *Hydropem thyroideum* non inepte dixisse.

Vidi etiam glandulosos quosdam lobulos, mole varios, a medio ut plurimum thyroidis isthmo propendentes, qui diductis utrinque musculis sterno-thyroideis, & sterno-hyoideis, in medio fere gutture, mobilis instar, & parvæ strumæ prominebant; & quanquam glandulosam thyroidis speciem omnino haberent, & ejus fortasse appendices ab initio fuissent; nihilominus solitariæ quasi erant, & a reliqua thyroidis massa

vix non omnino sejunctæ, perinde ac si rapido sui incremento maturitatem quandam adeptæ, patrium nexus amississent. Hujusce fuisse generis strumæ illæ videntur, quæ sine periculo eximi aliquando potuerunt: poterunt vero & in posterrum, quoties glandulæ portiuncula modo fint, & per exiguo vel nullo thyroïdi pedunculo implantentur.

Qui puerili ætate bronchoelem habent, magis inde laborare videntur, quam adulti: forte quia moliores tracheæ anuli compressionem inde majorem patiuntur.

Illud denique in bronchocele singulare notavi, non modo mentis hebetudinem & ferreum soporem ab ejus pressione induci, si immaniter crescat; sed surditatem etiam, & facetam sæpe, ridiculamque stultitiam ei confociari, licet exiguae molis fuerit (1). Mirum hoc sane, atque curiosum est, idemque tamen aliis corporis affectionibus commune, quæ cum certis singulæ animi habitudinibus passim conjunguntur. Cœcos ut plurimum esse hilares, tristes e contra surdos belle notavit venustissimus *Algarotti* (2) &c.

(1) Inter notas exteriores innatæ stultitiae strumosum guttur Platero memoratur (observ. lib. 1.)

(2) Opere, tom. 8. Pensieri.

*I N G E N S A B S C E S S U S  
S U B A X I L L A R I S.*

**Q**UOT QUOT illum miræ molis tumorem, a *Severino* descriptum, & icone expressum viderint (1); ægre procul dubio ferent, sectione, ut videtur, prætermissa, quid ipse contineret, & quas potissimum partes læserit, nos omnino ignorare. Quare cum tumorem persimilem mihi casus objecerit, accurata ejus descriptio non erit, arbitror, inutile illius historiæ additamentum.

Carolus Magistretti, 40. annos natus, ex oppido Fagnano in agro mediolanensi, vir agriculta, vere ineunte anni 1785, dyspepsia primum, interdum & vomitu laborare cœpit; quibus incommodis æstate proxima rheumatici in brachio finistro dolores successere, ad hiemem usque protracti, & tumor tandem in postica axillæ parte prodiit; isque tactu durus, & nullis domitus remediis, quotidie magis increvit. Qui primus eum inspexit Chirurgus pro scirrho habuit. Sed morbo velociter ad extrema perducto, anno 1786,

(1) De recond. abscess. natura, lib. 4. cap. 7.

4. idus Februarii in nosocomio receptus est. Ingens tumoris moles humanum caput longe superabat, & axillam abunde implens, brachium a pectore ad angulum removebat, & posterius prominens latissima, & ad spinam accidente gibbositate totam scapulam operiebat, cogebatque ægrum a dextro semper latere decumbere. Tanta tumoris immanitas, & situs ipse fecerunt, ut Severini iconem ad ejus lectum deferrem, cum qua illum sodalibus meis demirantibus compararem. Attamen æger noster gracilescit quidem, languet, & viribus sensim destituitur, sed a morbo suo, si molestam demas tensionem, non adeo excruciat. Integumenta interim communia intus effuso, & sub digitis undulante humore subatram velut umbram induerant. Quare cum durum esset tantum morbum, tristia omnia minitantem, otiose spectare, remedium ei anceps, quod desperatis alioquin rebus unicum erat, per caustici applicationem admotum fuit. Magna mox prodiit sanguinolentæ, nec tamen admodum fœtidæ lymphæ copia, a cuius effluxu tensione imminuta, nonnihil levaminis obtinuimus. Postera die febris cum frigore ingruit, copiosus humor iterum eductus est, odore gravi; deinde cereberrimis cum horripilationibus major febrium vis facta est, gangrenosa putredine tumor diffuit, &

quinto, ex quo apertus fuerat, die mors advenit. Integumentis & latissimo dorfi musculo posteriori incumbente exciso, tumoris moles conspi cienda venit, in cuius sinu profunda latebat cavea, atro corruptoque humore referta, terroram mephitim exalante. Durissimi in ambitu parietes circumadditis hinc inde minoribus scirrhis stipabantur. Magna autem caries scapulam vastaverat, cuius dimidia eaque anterior pars fere omnis absumpta fuerat. Apices processus coracoidi, & acromion, ut & lamella illa cartilaginea, quæ glenoidem scapulæ cavitatem obvestit, ab erosione superstites, sed reliquo ab osse sejuncti, fragmentorum instar, ligamentosæ humeri capsæ mobiles penilesque adhærebant. Minora alia ossis frustula interiori tumoris substantiæ interjecta visebantur.

---

*QUÆDAM DE HERNIIS.*

**Q**UAMQUAM intestina in herniis per anulos abdominales egredientia longo itinere ad inguina perveniant ; posteriori tamen abdominis parti altius adhuc alligantur ; nec peritonæi pars illa , ex qua primum assurgit mesenterium , folet unquam e sede recedere , ut herniam versus descendat. Hoc vero ipsum quandoque fieri posse , sequentes observationes docebunt.

In cadavere senis utrinque herniosi vidi omentum colique transversi partem in herniam dextram descendisse , quæ quia nulla erat partium cohæsio , in sua sede facile reponebantur. Hernia autem sinistra colon pariter hujuscē lateris recipiebat ; sed peculiaris intestini nexus cum facco reductiōnem vetabat. Quoddam enim ligamentum aderat , quod sub parvi mesocoli forma a peritonæo faccum herniarium efficiente intus reflexo in intestinum inferebatur , proindeque in exteriorem ejus tunicam , mesocoli more continuum incedebat. Ergo intestinum in hac hernia idem illud a facco herniario ligamentum mutuabatur , quod naturaliter a peritonæo accipit , regionem iliacam

posteriorem in abdomen tegente. Paucis veram habebis rei totius notionem, si id tibi fingas, peritonæum, quod muscularis psoadi & iliaco insternitur, una cum sinistra coli parte ad inguina descendisse, atque adeo mesocolon, vel si mavis ligamentum coli sinistrum secum ad herniam detulisse. Est igitur hic aliquid simile singulari illi naturæ operi, quo testes in fœtu ex abdome descendentes peritonæum comitatur. Quemadmodum enim testis ad scrotum delabens, peritonæum sibi adnatum secum ita rapit, ut hujusce membranæ pars, quæ olim psoadi musculo erat applicata, una cum teste descendens, in scrotri fundo hæreat; & quemadmodum illum sibi ita revincit, ut sine se nequeat unquam in ventrem regredi: non dissimili fere ratione peritonæi foccus se habebat ad coli partem scroto coercitam in illa, quam descripsimus, hernia. Quare satis patet, repositionem intestini in hac, aliisque id genus herniis obtineri non posse, nisi foccus herniarius, quocum externa intestini tunica continuata est, in abdomen simul reducatur.

Neque vero rarissimum id vinculi genus in herniis crediderim; etenim postquam hæc primo animadvertissem, duo hujusmodi exempla rursus vidi.

In viri cadavere , cuius herniam digitis partim reposueram , frustra conatus sum reliqua restituere. Saccum propterea diffeci , & colifinistri portionem per membranæ exterioris continuitatem cum facco revinctam manifeste deprehendi.

In cadavere altero , cuius testiculus dexter hydrocele laborabat , majorem quandam funiculi spermatici crassitatem ad anulum usque percipiebam , quæ facci herniosi fere vacui speciem præ se ferebat. Verum ego quidem saccum fectione detexi , sed ejus cavitas totam cæci intestini vermiciformem appendicem includebat , quæ cum suo mesenteriolo in ipsum saccum continuato retinebatur , nec in ventrem regredi ullo modo poterat.

Illud etiam tum in altero e superioribus exemplis , tum in aliis notatu dignum aliquando occurrit , macula nempe quædam , nigerrimo colore conspicua , irregularis figuræ , plus minusve lata , in interna herniarii facci superficie ad ejus fundum apparebat , etsi ne minimum quidem vitium in hisce partibus adesset , multoque minus inflammationis aut gangrenæ vestigium ullum. Ea primo intuitu tanquam atramento tincta videbatur , sed abradi non poterat , & peritonæi membranæ penitus insidebat , licet

ad

ad exteriorem ejus superficiem nihil pertingeret.  
Nonne si hujusmodi innocens macula chirurgo  
celotomen forte exercenti ob oculos incurreret,  
inani illum gangrenæ metu fallere posset?

Quoniam vero de herniario facco verba facere  
coepimus animadvertisendum est, solere illum  
ab anulis ad scrotum sensim detrusum, in supe-  
riorem incurrere testis partem, & firmum deinde  
cum elytroide ejus tunica nexum contrahere;  
quare ubi neglecta hernia in magnam molem  
increverit, pondere demissa suo, testem ita  
urget ante se detruditque, ut is fere semper in  
humiliori herniæ loco percipiatur, & funiculus  
spermaticus ad duplam longitudinem interdum  
protrahatur. In herniis tamen congenitis res sæpe  
se aliter habet; in iis enim aliquando testem  
vidi facco inclusum altius prope anulum sub-  
sistere, saccum vero ipsum longe prætergressum,  
una cum intestinis ad imum usque scrotum de-  
scendere. Singulare præ cæteris exemplum ado-  
lescens mihi præbuit, utrinque ab infantia  
oscheocele laborans, cuius scrotum utpote ab  
intrusis partibus occupatum, molis erat ingentis;  
testes autem parum infra anulum tangere, non  
tamen ultro detrahere poteram. Quod si herniam  
per taxin reducerem, testes una cum intestinis  
abdomen subibant, & scrotum vacuum relin-

quebatur; si testes educere curarem, intestina iterum relabebantur. Quid igitur consilii capiendum erat, ut soli testes scrotum occuparent, reliquæ partes apto sustentaculo coercerentur? An satius erat omnia abdomini committere, & scrotum inane reddere?

Est etiam quod herniario de facco differentes, aliquid de illa addamus vel unica vel multiplici accessorii exteriorisque facci specie, qui ab externa anuli ora productus vero peritonæi facco herniani includenti circumducitur. Hæc enim exterior lamina verum saccum non undique amplecti solet, sed ex eo deorsum protensa, relictoque ejus fundo, superiori elytroidis tunicæ parti insternitur, indeque fit, ut quando verus herniæ foccus ad ipsam testis tunicam non pertingit, insigne quoddam spatiū imo herniarī facci fundo, superiorique elytroidis oræ sèpius interfit, ab inducta accessoria illa lamina circumclusum; quo quidem in spatio aliquam aquæ copiam non semel reperi, peculiarem constituens hydrocelem, quæ *intersaccata* dici posset.

Notandum præterea est, tumorem ab herniis inguinalibus productum anulo plerumque non circumscribi, sed inde sursum ad ilia semper plus minusve protendi. Obliqua enim eminentia, velut unda quædam ab iliaca regione anulum

versus progrediens, in hernioso tuffiente conspicitur, quæ sensim descendendo crassescit, & in maximum inguinis tumorem confluit. Cujus rei causam in eo positam censeo, quod superior & externa anuli pars longe debiliiori donetur fibram textura; continuo autem supra illum aponeuroticæ obliqui externi fibræ raræ admodum, seu invicem distantes ad anulum diriguntur, & longiorem fissuram supra anulum continuam sæpiissime relinquunt; quo fit, opinor, ut vel in sanis hominibus obliqua quædam elevatio, juxta illius fissuræ cursum, tussis actu promineat (1).

Oblique igitur herniæ ab externa anuli parte provenire solent; atque hæc observatio non parvi est momenti ad situm epigastricæ arteriæ rite in herniis determinandum, ex quo melior deinde incidendi anuli, & tutissima regula desumitur, cum hac de re auctorum sententiæ differant. *Heisterus* enim docuit, anuli sectionem *introrsum*, *hoc est*, *lineam albam* versus faciendam esse, ne scilicet arteria epigastrica, quæ

(1) Debilitatem muscularum circa ilia, & herniarum ventralium in hoc loco frequentiam Celsus noverat, eademque res notatur a Cl. Bertrandi, ejusque egregiis Comment. (Vide opere anatomico-chir. tom. I.)

*exteriore latere provenit, simul concidatur* (1); idemque censuit cel. *Bertrandi*, & sanguinis in ventre effusiones, contraria ex methodo natas, reperisse testatus est (2). Verum Cl. *Sharp* (3), *Pott* (4), & plerique alii tradiderunt anuli sectionem extrorsum esse dirigendam; eademque methodus vulgo apud nos in usum venit, quam absque dubio optimam esse didici. Quanquam enim partibus juxta naturam positis, exteriori anuli loco epigastrica arteria reapse propior sit, aliter tamen res in herniosis sunt, quia peritonæi processus fere semper ab extima parte deducitur, arteriamque introrsum pellit; quæ ideo interius ad herniarii facci ostium deprehenditur, ut eam facile lœdas, si ab hac parte sectionem instituas. Optimum ergo consilium Cl. *La Faye* jam tradiderat, ut nempe ad fugiendam arteriæ illius lœsionem, anulus in herniis extrorsum incidatur (5). Unum mihi dumtaxat ex innumeris sese obtulit exemplum parvæ cujusdam herniæ, cuius saccus minime obliquum, sed

(1) *Instit. chir.* part. 2. cap. 117.

(2) *Trattato delle operazioni di chirurgia* tom. 1. c. 3.

(3) *Trattato delle operazioni &c.* cap. 4.

(4) *Traité des hernies*, sect. 5.

(5) *Vide Dionis opérations de Chirurgie demonstr.* 4. p. 344. nota (a)

directe sursum hantem ingressum, & arteriam exterius sitam habebat, hujusque generis fuisse videntur exempla a cel. Bertrandi observata, quæ tamen rarissima esse contendo. Sed nunc ad aliorum generum hernias pergamus.

In foeminæ cadavere mollis ventriculi hernia, pressione subsidens, convexa, circularis, sex pollices lata infra umbilicum facta erat; quod quidem tam demisso loco singulare est. Sed magis singulare erat, quod diductis ad tumoris latera rectis musculis, dimidia fere & interna fibrarum suarum pars supra tumorem expansa tensionis causa fuerat omnino detruncata, adeo ut superiorum fibrarum extrema lungo ab inferioribus intervallo distarent: exemplo scilicet, rectos musculos in magnis hujusmodi distensionibus non modo distrahi, sed & disrumpi posse.

Viro proceri & obesi corporis, sub onerarii cursus rotis prolapsò, totum pectus misere confractum est. Ejus porro cadaveris sectione instituta, præter ingentes sterni & costarum plurium fracturas, sinistram thoracis cavitatem magna ex parte a ventriculo & intestinis repletam reperi, quæ per amplam diaphragmatis peritonæi & pleuræ lacerationem ex abdomine in pectus intrusa fuerant. Speciatim autem huc propulsæ visabantur ventriculus totus, totum fere omen.

tum, colon transversum, & aliquot jejuni spithamæ; quæ partes alioquin illæsæ ad summum usque pectus protendebantur. Cum vero inferiores costæ a sinistris, superiores a dextris fractæ fuissent, hinc apparebat, ab hypochondrio primum sinistro superlabentes rotas pectus oblique traje-  
cisse, proindeque ex compresso ventre tantam thoracicam herniam fuisse factam. Cætera sine facco hæc hernia fuit, idemque ut plurimum fuisse in aliis hujusmodi herniis legisse videor. An membranarum ruptura facile in hisce contingit, quia in earum impulsione a nulla alia parte sustinentur, cum exteriorum herniarum saccum incumbentia integumenta satis valide tueantur?

Adolescens in nosocomium se recepit, cui ex parvo vulnere sub mamma sinistra, inter costarum ultimam veram, primamque spuriam inficto, egressa omenti portio visebatur. Erat ei pulsus debilis, pallida facies, respiratio labo-  
riosa. Cito vero febris accessit; epiploon vulnere adstrictum sponte decidit, & vulnus brevi fana-  
tum est. Jamque symptomata reliqua post decem dies leviora erant, & æger in melius vergere videbatur; cum rursus omnia recruduere; ab-  
scessus novus ad superius costarum intervallum sepe prodiit, eoque aperto magna puris vis ex-

cavo ipso pectoris effluebat. Æger tussi concus-  
sus, lenta febre consumptus, deinde leucophleg-  
maticus, tertio a vulnere mense supremum obiit  
diem. Sinistra thoracis cavitas puris abhuc mul-  
tum continebat, & pulmonis pars inferior a  
prægressa suppuratione consumpta fuerat. Fora-  
men insuper in anteriori & sinistra diaphragma-  
tis parte hiabat, per quod omentum pectori in-  
trusum, extremo sui limbo ad vulneris vestigia  
pleuræ adhærebat. Ex his patet hostilem cultrum  
a pectore ad abdomen demissum, pulmonem  
sinistrum, & diaphragma ita læsisse, ut ex illo  
suppurato lethale nasceretur empyema, & omen-  
tum ad pectus ascendere posset, thoracico immo  
ex vulnere prodire (1).

Pauca nunc liceat ad enterocelem gangrenosam  
spectantia hic addidisse. Satis convenit inter  
practicos, emortui in hernia intestini partem  
omnem absindere, proindeque aut ejus extrema  
sibi invicem in osculata, & consuta conjungere,  
ductus intestinalis continuitate persistente; vel  
patulo exterius ore ad anulum ita firmare, ut  
fæces ex inguine in posterum prodeant per anum,  
ut vocant, artificiale. Sed utraque in specie,

(1) Hæc nostra observatio aliqua ex parte ei con-  
gruit, quam Hildanus narrat Centur. 2. observ. 33.

etiam si res optime procedant, nonnulla adhuc superfunt timenda quæ quidem nosse artis est, & quoad ejus fieri potest, præcavere. Cel. *Læ* *Peyronie* diserte monuit, intestinum olim aperatum, vel ex parte abscissum, iterumque unitum, ibi loci plus minusve angustari, & colicos subinde excitare dolores propter difficilem excrementorum transitum, facilemque irritationem partis paullo adhuc infida unione debilioris; quo interdum fit ut lethalis iterum disruptio post aliquod tempus intus emergat (1). Neque vero suis caret incommodis anus artificialis. Præter enim foedam illam, atque involuntariam inepto loco excrementorum effusionem, forditiem, excoriationes molestas, nutritionis detrimenta (2) &c.; quandoque etiam accidit, aut ut intestini extrorsum inversi prolapsus fiat; aut ut sensim angustato ejus orificio, fæces æquo nimium detineantur, graviorum

(1) Mem. ac. chir. tom. 1. Lovis ibidem tom. 8.

(2) Trigenarius vir a dextris herniosus, tres fere tenuum intestinorum ulnas gangrena amiserat. Attamen tantum discrimin inopinato evasit cum ano artificiali. Verum cum domum rediisset, forte ob auctum corporis motum plus nutritionis postulantem, quam quæ ex brevissimo intestinali ductu suppeditari posset; vel etiam ob pravam vivendi rationem, eum accepi paullo postea periisse.

malorum, nec non & mortis periculo. Enterocelē vidi gangrenosam, quæ utraque hæc intulit damna, quorum alterum lethale ægro fuit.

Pistor an. 21, oscheocele strangulata labrans, celotomen passus est. Intestini tenuis portio quædam gangrenosa periit, & extrema abrupti tubi ad anulum firmata coaluerunt, ano artificiali superstite; & æger intra duos menses convaluit. Sed paullo post domum redux, cum diutius erectus stetisset, altero coactus infortunio nosocomium repetit. Siquidem ex ano artificiali, intestini procidentia spithamam longa facta est, quæ crassioris nonnihil inflexi cylindri speciem exhibebat. Inversio ista ad inferiorem spectabat intestini partem, non ad superiorem, cuius osculum in inguine distinctum conspiciebatur. Interim frustra tentata procidentiæ restituzione, intestinum nonnihil inflammatur, & purulentam induit faciem; sed cum fere hic optata abesset gangrena (1),

(1) An interna intestinorum superficies, utpote muco obducta, & magis vasculosa, ubi extrorsum inversa nudo aeri exponatur, minus inde laeditur, quam externa? Nonne huc faciunt experimenta illa, quibus constitit, nonnulla ex iis, quæ impune passim ingeruntur, graviores tamen noxas intulisse, cum abdomini injecta extrinsecus intestinis applicabantur? (Bertrandi operazioni chir. tom. I.). Miram etiam internæ intestinorum superficie securi-

prōlapsæ partis separatio in longum protrahebatur, aptoque ideo ad ejus basim injecto vinculo, quidquid erat prolapsi absque gravi noxa ablatum est, & æger iterum convaluit. Paucis elapsis mensibus, alvus ei constipari cœpit, fæces nimirum ex inguine ægre tardeque emitti; tandem gangrenæ interioris urgentibus symptomatibus, vix ad nosocomium miser adolescens delatus, fatis cessit. In cadaveris sectione animadverti, duo in inguine dextro adesse ostiola inter se æqualia, prominulo quodam anulo circumsepta, quæ ilei finem & coli initium præ se ferebant. Sed ileon intestinum, ubi in inguine terminatur, ad pollicis spatiū adeo coarctabatur, ut liquidioribus tantum excrementis, & ægre quidem pervium esset; unde factum est, ut a crassiorum supra inguen detentione jejunum & ileon immanneriter distenta turgerent, & gangrenosa inflammatione corriperentur. Colon autem intestinum ab inguine assurgens, consuetum tenebat cursum,

tatem non ita pridem vidi in sene an. 66., qui sub aliis medicamenti specie deceptus, emplasti nostri vesicatorii drachmam sumpsit: errore cognito, magnam aquæ copiam hausit, & post aliquot horas alvus ei pluries soluta est, dejectoque promptius emplastro, nil mali inde passus est, quamvis manifesta in lingua viciniisque exulceratio acciderit.

omnis inflammationis expers, sed angustum valde, collapsum, & vacuum. Mortis igitur causa fuit constrictio illa superioris intestini ad inguen aperti, quæ tamen turundis lineis, spongia cerata, & hisce similibus devitari potuisset. Cæterum in isto adolescente cæcum intestinum nec olim in hernia, nec ultimo in cadavere unquam apparuit. Quamobrem ablatum in integra intestini inversione fuisse, quæ vinculi ope cecidit, censeamus necesse est.

Atque hæc manifesta omnium simul tunicarum inversio ad similem illam recti intestini inversionem nos obiter convertit, quæ ani prolapsus audit; & de cuius vera essentia & natura clarissimi inter cæteros *Morgagni* (1), *Schacherus* (2), *Sabatier* (3) merito querebantur, pauca satis certa, & sectione explorata nos hactenus habere. Observationes itaque proprias, quas pro re nata instituimus, juvabit hic adducere, a quibus certiores facti sumus, veram in ani procidentia omnium simul intestini tunicarum inversionem sæpiissime locum habere: aliquando interioris tantum tunicæ relaxationem; tum minorem muscularum ano inservientium firmitatem; tum

(1) Epist. 33.

(2) Disput. chir. Haller tom. 3.

(3) Mem. ac. chir. tom. 15.

denique extremi proprie intestini prolapsum, quamvis ob ejus firmas cum proximis partibus adhaesiones, impossibilem hujusmodi speciem plerique arbitrentur.

In foeminæ cujusdam cadavere extra anum apparebat excrementia rubra, mollis, fungosa, sub anuli irregularis forma inter nates prominens, quæ cum interiore ab intestino recto originem duceret, dubium nullum erat, quin vera esset ani procidentia. Cum vero mollior præ cæteris & tenuior hæc mihi videretur, protinus suspicatus sum, hujusmodi procidentiam a sola interiori tunica esse factam; & reapse ita se rem habere comperi, quando ab interiori pelvis cavitate positionem inspiciens recti intestini, nil hic mutatum inveni, neque intestinum ipsum manibus apprehensum sursum trahens, obtainere potui, ut pars prolapsa intra anum reduceretur, quemadmodum fieri debuisset, si ani procidentia a totius intestini inversione producta fuisset. Quod si digitis extrinsecus admotis, ejusmodi procidentiam in anum utcunque reponerem, eam videbam tanquam extraneam non bene intus aptari, & explicari posse, sed alieni instar corporis, intestini cavitatem dumtaxat impedire. Denique intestinum ipsum a pelvi solutum, & secundum ejus longitudinem apertum, internam tunicam

vere laxatam, obtulit, & extra ejus orificium elongatam, ab interno ani margine paullo altius pendentem, eaque forficibus circumcisa, muscularis tunica optime constituta, & per exiguum spatum denudata apparuit.

Puerulus an. 8., gravibus calculorum doloribus continue excruciatus, si quando ab iis vehementius premeretur, notabili solebat ani prolapsum laborare, qui dolorum acerbitate imminuta, sponte recedebat, aut facili negotio componi poterat. Observavi tamen, quod si digitis anno immisis diutius intestinum attrectaretur, vesicæ iterum dolores suscitabantur, & tunc fortissimus deorsum premitus ad anum & perinæum exsurgebat, unde primum erat deducere, molestissimos calculorum accessus veros esse vesicæ spasmos, accedente muscularum abdominalium contractione, cuius ope inimicum calculum natura conatur expellere, eo fere pacto, quo doloribus ad partum excitatis, maturi fœtus expulsionem ab utero, feliciori nisu illa molitur. Cæterum infelix parvulus post aliquot decubitus menses, cruciatibus diuturnis, diarrhoea, & lenta febri confectus periit. Quare anatomico cadaverulum examini subjiciens, ut in iis tantum immorer, quæ ad ani prolapsum spectant, eum quidem inveni ab omnibus simul

intestini tunicis extrorsum devolutis esse factum, sed ita ut insignior pars ex tunicae interioris laxitate oriretur. Etenim reducta licet procidentia, fungosa hæc membrana cavitatem recti intestini molliter implebat. Quod si circa procidentiæ corpus membrana illa detunderetur, perspicuum fatis erat, reliquas, intestini tunicas minorem longe procidentiæ partem constitueret.

Quoad exiguum muscularum ano infervientium firmitatem, sive causa ea sit, sive effectus procidentiæ, res omni caret dubietate; quotquot enim intestini recti prolapsu laborant, latiorem multo anum habent, & tenui aut vix ulla pollentem resistentia. Mulierem hydropicam vidisse memini cui cum magno recti intestini prolapsu anus erat adeo amplius & latus, ut omnes utriusque manus digitos, & solidum pugnum reciperet. Quod si manum removisses; continuo redibat procidentia, cumque ob ani amplitudinem introspici commode posset, manifeste observabam extremam ipsam recti intestini partem, statim ac fibi relinqueretur, extrorsum procidere, ita ut digitus ad procidentiæ basim circumductus, cæcum undequaque finem deprehenderet.

Nec aliter se habebat alterius mulieris cadaver, in quo procidentiæ corpus non ut folet cylindricum erat, sed subrotundum, & mole sua in-

fantis caput exæquans. In anteriori ejus procidentiæ parte mollities summa , immo humoris fluctuatio percipiebatur , qui aucta pressione sub manu cedens, in pelvim se recipiebat ; quam obrem vulnusculo inflictō, prolapsu statim mole multum subsidente , aliquot aquæ libræ effluxerunt. Tantus porro humor in eo peritonæi fundo collectus erat , qui naturaliter inter vesicam & rectum intestinum paullo altius abest ab ejus extremo , & qui nostra in specie cum recto ipso detrusus , ad imam usque procidentiam descendebat , atque infundibuli instar defluentem a ventre lympham ita recipiebat , ut ne gutta quidem in illo amplius supereffret. Singulare in hoc exemplo paracentesis genus non immerito iis adderetur , quæ in umbilico , in facco herniario , & in ipsa denique vagina instituenda passim quibusdam memorantur , quasi de antiquo illo & solito & optimo paracentesis loco , quæ in media ab ilio ad umbilicum via peragitur , essent pertæsi.

Jamque hujuscce rei consideratio in mentem revocat nonnulla in insolitis hujusmodi paracentesis locis a me instituta certamina , quæ mihi tamen non ita cesserunt , ut ea renovare admidum cupiam. Perforationem abdominis in umbilico tentavi , sed ea nec commode institui potest

ubi umbilicus non bene promineat, nec vescica illa solis conflata integumentis acum triquetram sustinet; ut lanceola utendum sit, cuius incisio cannulae diametro nunquam bene congruit (1); atque hinc aqua tum ex immissa cannula, tum ex ipsa incisione profluit, sed ex neutra satis opportune. Evidem cannulam omittere satius interdum esset; verum subjecti tunc omenti particula per vulnusculum facile effugit, cuius vel minima attractatio, si de asciticis praesertim agatur, quibus omentum fere fracidum est, non omni caret periculo. Videmus passim quam facile spuriæ illæ abdominis inflammations aquarum eductionem consequantur.

In paracentesi facci herniarii, ab anulo abdominali egredientis, illud ex mea quidem observatione commodi est, quod foccus iste sola aqua in asciticis repleri soleat, & intestina tunc facile in abdomen refugiant, ibique consistant (2);

(1) " La cannule ne pourra jamais être proportionnée à l'ouverture, quand elle n'y sera pas placée conjointement avec l'instrument, qui lui ouvre sa voie. ( Lovis mem. 1. sur la Bronchotomie. Ac. chir. tom. 12.) "

(2) Quædam id genus exempla, aquæ scilicet in herniario facco absque intestinis hærentis, leguntur etiam apud Cl. Nelli instit. chir. tom. 4. pag. 17. 18. quo in opere optima quæque, & utilia quæ ad rem herniarium pertinent, accuratissime concessit.

forte

forte ob auctam ventris capacitatem, & majori aquæ gravitatem, ob quam in decliviorē saccum dilabitur, intestinis repulsis, qui in superiori abdominis lacu leviora innatant. Sed non pauca huic methodo vicissim infunt incommoda; ita ut licet in nostro nosocomio res semel felicissime aliis processerit; attamen illam utpote dubio plenam in medio relinquere, tutioris fortasse consilii videatur. Me sane iterum atque iterum expectatio fecellit. Etenim exigua tensio, quæ facco in abdomen hianti conciliari poterat, lanceolæ tantum locum dabat, eaque satis alte demissa, parum adeo lymphæ prodibat, & quamvis lanceola saccum, & cannula rufus tentarem, irrito nihilominus conatu, ab incepto desistendum fuit, & ad consuetam methodum configiendum. Felix etiam paracentesis exitus ab opportuna pendet facci dispositione, qua in ventre apertus hiat; sed hiatus iste non raro angustior est; intestina quoque a primo aquarum fluxu ad anulum facile delata viam obstruunt, nec semper integrum est ea per obliquum & longiorem a facci cavitate ductum, specilli ope repellere. Animadvertis deinde est, exiguis herniis os facci in ventre aperti plerumque obliquum esse, nec semper e regione anuli, sed saepe paullo exterius positum. Facili tandem negotio fit, ut evacuatis

ex parte aquis, peritonæi non amplius distenti labra, quæ ad facci introitum patent, sensim collabentia conniveant, & effluentibus aquis viam occludant.

In ascitici cadavere cylindrus mollis, & fluido humore plenus, ab anulo ad testem descendebat, qui nec sui nec ventris compressione quidpiam immutabatur. Cylindrus iste saccus erat herniarius, nil præter aquam continens. Inciso ventre, tota ejus aqua profluebat, sed nulla in eo facci apertura primo intuitu apparuit, nisi cum facco ipso manu compresso, aquæ rivulus in ventrem exsiliens, angustum quoddam portendit ostiolum, quod longe ab anulo in posteriori peritonæi parte, prope musculum psoadem hiabat, & a parva peritonæi plica in valvulae modum disposita obtegebatur. Ab hoc ostiolo sinus admodum angustus ad anulum pergens, in ampliorem facci exterioris cavitatem aperiebatur. Circa anulum ipsum facci parietes nonnullas invicem adhaesiones contraxerant, quæ progressu temporis communicationem facci cum abdomine intercipere potuissent, & distinctum facere herniarii facci hydropem, quemadmodum a *Saviardo*, *Dranio*, & *Heistero* observatum legimus; et si Cl. *Bertrandi* de eadem hac re subdubitans, observatorum diligentiam in hujusmodi herniis recensendis exitaverit (1).

(1) De Hydrocele Mem. ac. chir. tom. 7.

*ABSCESSUS EX PELVI AD FEMUR  
PROPAGATI.*

**A**bscessus in suprema femoris parte erumpentes altiorem quandoque a pelvi originem habent; quapropter ubi primum appareant, quinam sint morbi fines, diligenter est inquirendum. Si enim doloribus ad lumbos vel ad ilia prægressis, femur tumeat, & insignis se prodat suppuratio absque magnis in exteriori sede inflammationis indiciis; si dolor viam tenere videatur ad pelvim protendentem; si febris, macies languor, & puris copia maiores existant, quam qui ab exteriori vitio expectari potuissent; si quæ latentes abscessus tam sæpe comitatur, diarrhoea frequens accedat, de recondito morbi fomite vehementer erit dubitandum.

Scio equidem mala hæc jam a clarissimorum virorum observatis in arte innotuisse; rei tamen gravitas ea est, ut alia prioribus addere, labor non irritus videatur. Raro etiam practicæ historiæ inter se similes omnino sunt; & in rebus pathologicis, aliter ac in botanicis, species a varietatibus superantur.

Viæ porro per quas hujusmodi interiores abscessus propagantur, duæ esse solent: vel enim, ut sæpius fit, secundum psoadis & iliaci musculi decursum pus ad femur descendit, & excitato sub inguine tumore sese prodit: vel idem humor per foramen ischiadicum posterius elabens, ad trochanterem majorem, vel paullo infra collectus, iter extrorsum sibi facit, nisi aliud ab arte param inveniat.

Juvat autem animadvertere, rationalia indicia, quæ ab initio proposuimus, in hujusmodi aliquando abscessibus desiderari, & secundarium femoris morbum sub eo intuitu sese offerre, ut diligentiores, morosioresque simplicis, & localis vitii larva facile decipiat.

Adolescens ann. 20., optimæ valetudinis, festo die cum amicis incedens, improviso dolore innate dextra correptus fuit, eoque succrescente, nosocomium postridie adiit. V. S., purgatio nil levaminis afferebant; cataplasma emolliens dolenti parti imposuimus, ibique tumor oriri cœpit, quem sensim auctum, & post 20. dies in magnum elatum hemisphærium, cum profundæ suppurationis indiciis, triplici incisione aperiebam, digitisque immisis amplam reperi sub gluteo majori cavitatem, unde multum puris albi & densi prodibat, ligamentum vero sacro-ischiadicum nudum

fere tangebam. Diebus insequentibus sanguinolentum pus, dein grumosus & subcorruptus crux prodiit; febris cum frigore ægro quotidie ingruit; abscessus tandem gangrenosus factus est, & nono die mors venit. Omnia in cadavere sub gluteo maximo corrupta erant, sed labes ab ipsis pelvis penetralibus procedebat. Aperto enim abdomine, visceribusque remotis, putridissimus ad internam ilii dextri faciem, sub iliaco musculo, abscessus patuit, qui inde in imam & dextram pelvis partem descendens, per foramen ischiadicum sub pyramidali musculo se ad femur demittebat.

Mediolanensis puer an. 12., cum tribus ab hebdomadis sub dextro inguine femoris abscessum gereret, ad nosocomium se contulit. Paucis diebus abscessus sponte sua apertus est, multumque puris effudit; angustoque ejus orificio immissa spongia dilatato, copiosiori materiæ, pejorem sensim indolem assumenti exitus est patefactus. Sed æger jam languidulus, summamque ad maciem perductus, anfimerina quadam febri, nec non diarrhoea confectus periit. Puris receptaculum satis amplum in superiori aderat femoris parte, inter adductores musculos, & fectorum. Foetida cavea hisce partibus interjecta, prope minorem trochanterem profunde penetrans, ad os accedebat, sine ullo tamen ejus

vitio. Inde juxta flexores musculos per ulcero-sam viam ascendens, ad lumborum vertebrae ducebant, quarum postremæ, non secus ac anterior sacri ossis facies, nudæ, & cariosæ apparebant, diducto ab iis perioste, una cum ligamentosis fibris, qui vertebrarum corporibus imposita sunt. Hæc porro involucra, ab ossibus quidem soluta, sed adhuc integra, saccum quemdam efficiebant, ex quo purulentus ibi interceptus humor circa imam & dextram partem ultimæ lumborum vertebræ, data porta, effugiens, inter musculos psoadem & iliacum fluens ad femur delabebatur. Aliquid simile & a sinistris incipiebat: quædam enim puris guttulæ in respondentibus musculis sese insinuaverant, ad femur pariter tendentes. Præter hæc ultima lumborum vertebra binis instruebatur osseis tuberculis inæqualibus, & universa cartilago illam sacro ossi adnectens, erosa penitus, & fere ad nihilum redacta fuerat.

Æquale fere exemplum alio in puero vidi, qui ex fistula in femore dextro paullo infra majorem trochanterem obierat. Observavi enim fistulæ vicinias omnino corruptas, & vitio ad superiora tendente, ipsos gluteos musculos profunda affectos gangrena. Interioribus partibus inspectis, magna reperta est suppuratio sub

anteriori quartæ, & quintæ lumborum vertebræ, & facri ossis involucro; ossa idcirco nuda erant, atque cariosa; cartilago postremæ vertebræ, perinde ac in priori exemplo absunta, & fanies, nervis nihilominus integris, spinalem tubum alluebat. Ex hoc abscessu humor inferius ad latera facri ossis erumpens, & ex pelvi per obvium foramen ischiadicum egressus, ad femur, fistulam versus decurrebat. Verum & a sinistris per alterum foramen juxta nervi ischiadici ductum fluens, superiorem pariter & posteriorem femoris partem attingebat, tam exigua copia, ut tumorem nondum efficeret. Tertius denique puris rivus a dextris aderat, qui muscularum femur flectentium iter legens, dextrum ad inguen ferebatur: singulari prorsus spectaculo, unius in pelvi abscessus, qui tribus simul viis ad femora propagaretur.

Ad femoris vitia suum ex abdomen nacta principium spectat gravissimus, qui mihi se objecit, complicatusque morbus, cuius historiam, mira quædam, & fortasse inaudita exhibentem, paullo fusius exarabo.

Joseph Bigatti, farcinator mediolanensis, annorum 36. nosocomium ingressus est IX. Kal. Junii an. 1787., & nos primo docuit, sex abhinc mensibus crebris se affectum fuisse doloribus,

eosque principio dextrum femur, deinde sinistrum aggressos, rursus ad dextrum delapsos, ibi in posterum constantius hæsisse; bene se tamen ad quatuor usque menses pedibus incessisse, rebusque vacasse suis; aucta tum deum dolorum vi, tumorem læso in artu apparuisse, & incessum sibi omnem fuisse prohibitum. Inde, ut per nos ipsos cernebamus, debilis factus est, macer, nocturnis insuper sudoribus diffluens, lentaque subæstuans febri. Universum crus dextrum œdemate turget, ita tamen ut maxima circa femoris articulum intumescentia conspicatur, a qua incessus impedimentum præsertim oritur. In inguine, & paullo altius in iliaca regione tumor alter obscurior adeat, qui a pressione nonnihil dolet, & in toto femore major caloris sensus percipitur. Cum res ita se haberent, decocti chinæ potionem, & fomentum ex aqua calcis cum vini spiritu alicui auxilio futura esse censuimus. Cumque æger sex abhinc annis gonorrhœam & ulcuscula in glande passum esse fatetur, placuit aliquas pilularum mercurialium doses periclitari, a quibus tamen, ob accitam diarrhoeam male cedentibus, cito oportuit abstinere. Junio mense desinente, femoris intumescentia nonnihil subsidere visa est, & mollescere, atque humor sub integumentis effusus,

si digitis premieretur, facile ad vicina loca diffundebatur. Qui contra supra inguen aderat tumor in dies crescere, maiores ciere dolores, & in magnum tandem terminare abscessum, quem IX. idus Julii lata incisione aperiebam. Exiit materia quædam cinerea & foetida, non sine quodam aereo halitu, qui perforati intestini suspicionem fecerat, falsam tamen, ut cadaveris deinde sectio nos docuit. Aliud insuper foraminulum in inguinis fulco sua sponte prodiit, simili humore copiose diffluens. Febris interim nihil domita, suppuratio mali moris, & hisce diarrhoea novissime addita, X. Kal. Augusti, ægrum perdidere. Cellulosa tela cultro dissecta, in lævo artu sicca, in dextro crure, & femore copiosissimam undique lympham emittebat. Integumenta circa abscessum posita, per latam tecti ulceris aream a sepositis partibus sejuncta erant, & ex adverso gangrenosa. Ex hac plaga profundior sub inguinali ligamento hiatus viam commonstrat, qua ad internum abscessum alterum eatur, ilium dextrum occupantem, & nigrescente peritonæi membrana opertum. Musculi psoas & iliacus fere omnino putrefacti sunt, corruptione ad femur deorsum producta, tricipiti musculo, & pectinæo ad minorem usque trochanterem simili labe affectis. Scirrhosa cor-

pora durissima ad vesicæ & intestini recti latera magnam a dextris pelvis partem obsidebant. Magna præterea ossis pars circa pubis cum ilio conjunctionem, & altiorem simul acetabuli fundum, in steatomatosam substantiam abierat. Sed maximum vitium, a quo reliqua originem duxisse crediderim, ad lumbos apparuit, ingens scilicet scirrhosa moles, quæ vertebris incumbens earumque infimas quatuor undique amplectens, antrorum in abdomine insigniter prominebat, & aliquanto magis ad dextram vergens, præter intestina cætera, ita duodenum a tergo urgebat, ut licet in posteriori ventris parte circa vertebrae situm esse soleat, ad anteriores hic abdominis musculos quam proxime accederet. Ejusmodi tumoris durities, substantia, color non eadem ubique sunt. Superius ex majore sui parte albicanti steatomati similis; in reliqua durior, fuscus, & scirrho propior est; inferius a dextris gangrenosus de iliaca corruptione participat. Renes ad tumoris latera utrinque accreti, ultra morem a se invicem diducti sunt. Dexter insuper, proprio uretere a duriori tumoris parte arctissime comprehenso, lotum vesicæ committere impotens, structuram omnem amisit, & una cum sua pelvi dilatatus, vesicularum seminalium instar, membranei facci cellulosi speciem

exhibit. Sinister e contra a tumore liberior, & hinc sanus, ureterem suum ad vesicam sospitem mittit; sed ejus moles duplo fere aucta, uberiori posse urinæ secretioni sufficere videbatur. Quæ quidem partium dispositio, *Morgagni* doctrinæ optime convenit: “*augeri nempe, ait, ob renis comparis absumptionem, alterius qui sanus sit, magnitudinem* (1). Cum tantas ex morbo variaciones cadaver ostenderet, in magna abdominis vasa æquum erat inquirere; quæ et si nihil mali perpesta fuisse credendum non erat, attamen tam grandia contraxisse vitia, quanta oculi docebant, nec suspicari fas erat, nec sensibus interdum meis fidem habebam. Aorta itaque e diaphragmate vix egressa, obvii tumoris substantia se immittit, in eoque sepulta iter suum tenet, coeliaca, mesentericis, & iliacis arteriis ex scirri finibus tantum erumpentibus. Atqui aorta & ab ea geniti insigniores rami hactenus integri sunt, & canalis retinent formam, licet valida undequaque compressione angustentur. Graviora longe passus est venæ cavæ inferioris truncus, & quæ ab ejus divisione prodeunt, venæ iliacæ atque crurales. Hæ quippe in pelvi, & per omnem utriusque femoris longitudinem exami-

(1) Epist. 40. n. 14. 15.

natæ, durissimis tunicis, solidi adinstar cylindri, sub digitis volvi poterant, & a parietum crassitie *magnam sui luminis* partem amiserant, quod vero supererat, a compacto grumosa concretione omnino replebatur, frequentibus hinc inde accedentibus transversis fibris, per quas interiores venarum parietes invicem cohærebant. Perfecta hujusmodi venarum cruralium, & iliacarum obstructio manifeste vetabat, quominus ulla inde sanguinis gutta ex inferioribus artubus ad cavam reflueret. Sed cava ipsa ubi obcæcatæ venæ iliacæ in eam concurrunt, non minus cæca visa est; quin immo informis ille funiculus, qui venæ cavæ locum tenebat, secundum vertebrarum corpora sese de more attollens, in dextram & inferiorem descripti tumoris partem protinus incidebat, cuius interiores recessus, pulsi quadam albida & molli refertos subiens, in eandem substantiam dissolvebatur, atque ita evanesceret, ut nullum ejus vestigium deprehendere licuerit, nisi ad altiorem usque tumoris oram, ubi ex scirrho singulari tubere reliquus venæ truncus, manifestissime infera sectus, emergebat, emissisque venis emulgentibus, jam bene constitutus ad hepar tendebat. Ergo omnis ab emulgenti dextra ad iliacarum originem, venæ cavæ longitudo, miro modo exesa, & abrupta perierat,

quin ulla consecuta esset sanguinis effusio. Quod quidem mirum esse definet, si animadvertis, inferiorem obtruncatae venæ partem exanguem omnino fuisse, & superiorem alteram e tumore egredientem, ab urgentibus circumpositis scirrhis ita fuisse compressam, & clausam, ut nullus regressuro sanguini locus suppeteret. Mens insuper erat, minora crurum & abdominis vasa ad examen revocare, sed incredibilis foetor, & undique, praesertim vero in abdomen livescentis cadaveris horror, plura conantem penitus prohibuere.

---



---

*DE PECULIARI QUADAM  
ABSCESSUUM  
IN PERINÆO RATIONE.*

**A**bscessus in perinæo sub acceleratoribus musculis quandoque fiunt, qui adeo singulares sunt, ut nisi eorum naturam rite perspectam habeamus, vix possibile fit opportunam curationis methodum instituere. Accuratam de hac re notionem nusquam reperi, nisi in recentissimis ad *Bertrandii* opera commentariis (1), ubi pauca huc attinentia, sed egregia omnino, & verissima proferuntur. Ad majorem rei explanationem, quæ in similibus speciebus aliquoties adnotavi, breviter addam.

Horum igitur abscessuum origo ut plurimum esse solet ex suppuratis Cowperi glandulis, unde materia vel per canales excretorios in urethram transfit, vel extus retenta, sub musculis bulbocavernosis primo colligitur, deinde ex ipsis erumpens, subcutaneum abscessum procreat. Qui

(1) Tom. 6. pag. 233. nota (a).

tamen quando utriusque glandulae suppuratione con-  
tigerit, duplice habere fontem deprehenditur,  
utrinque a lateribus urethræ altius haerentem, &  
ab intermedio præsertim bulbo separatum, licet  
exterior abscessus unicus appareat. Quamobrem  
duplex vitii fundus duplice sectionem postulat,  
quæ ad coxae tuber utrinque producatur, ut  
laterales nempe, discretique abscessus fines rite  
expurgentur, tutamque ad sanationem perducantur.  
Atque in hunc etiam finem opportuna res  
esse, & aliquando fortasse necessaria videtur,  
abscessus fundo diligentius explorato, detectoque,  
si fieri possit, foramine illo, quod in alterutro  
musculo bulbo cavernoso, vel utrinque extat,  
profundiori in ipsos musculos incisione dilatare;  
ut libera ex superiori sinu ad inferiorem commu-  
nicatio aperiatur. Si enim hunc morbum atten-  
tius intueamur, quadruplum reapse abscessum  
existere comperiemus: dextra scilicet ejus parte  
per bulbum a sinistra; superiori vero ab inferiori  
per acceleratores musculos interdistincta.

Difficultas vero non minima inde oritur,  
quod singulo acceleratori musculo subjectus  
humor non simul semper eodemque tempore  
viam extrorsum sibi facit, sed alteruter modo  
abscessus externus fit, tumoremque in perineo  
subcutaneum excitat, atque hic cum vere unicus

videatur, unicam incisionem admittit. Interint altera in opposita parte latens suppurationem suam seniori tempore molitur, efficitque ut morbus deinde renovetur, aut saltem recrudescat, qui nondum omnino sanatus fuerat; nisi etiam diutius cohibita materia altius erodendo pejora fecerit.

Neque ex sola in Cowperi glandulis suppuratione hujuscce generis abscessus fieri observavi; verum etiam ex duplii quadam urethræ fistula, quam continuo post majorem aliquam ejus ad perinæum angustationem cadavera quædam obtulere.

Anno 1788. Kal. Februarii Carolus N. Mediolanensis, an. 47., stranguria laborans, ad hoc nosocomium se contulit, eique parvus tumor in perinæo paucos ante dies apparuerat. Juvenili olim ætate binas æger gonorrhœas, proindeque aliquam, semper ter quaterve per annum, hebdomadariam urinæ difficultatem passus fuerat. Nobis itaque fistulæ, aut cereoli introductionem tentantibus, insuperabile in perinæo sese objecit impedimentum, quod nullo modo prætergredi potuimus, quamvis omnem æger urinam guttam, erectoque corpore emitteret. Tumor deinde in perinæo lente succrescebat, in eoque æger aliqua ex parte lotium fluere ultimo fentiebat,

tunc-

Tuncque majus tumor incrementum obtulit, subi-  
 taque ad scrotum usque & hypogastrium diffu-  
 sione sese expandit. 5. Idus Martii, perinæi  
 tumor cruciali sectione aperiebatur, magna cine-  
 rei foetique humoris vis effluxit, indeque digitus  
 ad medii septi latera, per patulam utrinque viam,  
 scroto injici poterat, quod etiam ab utroque  
 latere incisum fuit, ut effuso humoris promptior  
 exitus esset. Sed gangrenosa in abscessu oborta  
 labes magnam postea integumentorum perinæi,  
 scrotique partem destruxit, ut nudi fere testes  
 superessent; urina vix non omnis ex perinæo  
 fluere cœpit, & quamvis ulcus temporis progressu  
 satis mundum evasisset, æger tamen ex recur-  
 renti & anomala febri, diutinaque suppuratione,  
 pridie idus Junii fatis cessit. Quæ in cadavere  
 visa sunt, ut paucis perstringam, hæc fuere:  
 Vesica crassa & angusta, cum parva ad ejus  
 fundum suppuratione, quæ in abdominis cavita-  
 tem eruperat; prostata omnino suppurata, &  
 in purulentam cystim conversa, quæ tamen in-  
 tegra adhuc erat, & undique clausa. In urethra  
 circa bulbum perfectam a corrugatis, & invicem  
 concretis parietibus synizesin invenimus; quæque  
 proxime sequitur membranosa canalis portio,  
 foraminula duo, utrinque inferius hiantia ostendit,  
 quorum sinistrum continuato juxta urethræ bul-

bum sinu in ulcerosam perinæi cavitatem apertum erat: alterum vero a dextris peculiarem extra urethram loculum adibat, qui ab adhuc integro acceleratore musculo ita inferius coercebatur, ut inde nulla ad perinæum via hactenus extitisset.

Anno 1787. Jd. Julii, vir an. 33. ad me venit, duriusculum in perinæo ad nucis formam crassitiemque tuberculum habens, quatuor ante menses obortum, quo digitis presso, puris non-nihil ex urethra egrediebatur, ut eum gonorrhœa infectum aliquis crediderit. Neque enim ex vaga æger, liberiorique venere se conti- nuerat; quia tamen impune id ei perpetuo ces- ferat, tumoris originem ex præcipiti potius equitatione natum arbitrabatur, a qua dolorem in perinæo persenserat, quem brevi licet evani- dum, sex elapsis mensibus, tumor ille consecutus erat. Quemadmodum vero hoc morbi initium fuerat, sic iter alterum, postquam ego eum videram, in rheda suscepimus, crebris concussio- nibus fecerat, ut gravis inflammatio excitaretur, aucto & ad totum perinæum diffuso tumore, a quo maxime dolens, ne emollientis quidem cataplasmati impositionem ferre poterat. Postridie kal. Augusti, suppuratione facta, longam sub scroto ad anum fere incisionem instituebam, eductaque purulenta materia, subcutaneam absces-

fus cavitatem glomeribus implebam. Maxima lotii pars satis libere per urethram emittitur, paucis exceptis guttis in perinæi abscessum fluentibus. Ut autem urethræ fistula facilius consolidaretur, opportunam cereolorum immisionem duxi; sed non expectatam urethræ angustationem ad perinæum offendi, quam argentea tantum fistula aliqua vi, & non sine sanguinis effusione superare potui, cui flexilem deinde catheterem, commodius in urethra retinendum, substitui. Triduo post fistularum usum placuit iterum cereoli introductionem experiri, & superato leviori quodam obice, ad vesicam usque pervenire licuit. Jamque quindecim circiter diebus elapsis, cum urinæ nihil in perinæi abscessum derivaretur, detersoque ejus fundo, felix a sinistris vegetatio cavitatem omnem promptius implevit: a dextris vero, imo de latere bulbi, ad ischium os, in illa ulceris sede, unde lotii guttulas provenire antehac videram, vegetatio lentius assurgebat; sed hæc quoque pars mensis spatio inducta carne expleta est, ut leve tandem ulcus cito sanatum iri expectaremus. Præterito tamen ab incisione abscessus sesquimense, doluit æger se aliquas urinæ guttulas ad perinæum devias percipere; & ego ipse proprius oculos perinæo admovens, sedulique inspiciens, novum reapse foraminulum in

sinistra ulceris ora nuper apertum deprehendi; qua tenuis urinæ rivulus mingendi actu profluebat. Nova res ut proximæ sanationis spem omnem præcidebat, ita nobis gravissimum injecit dubium de altero in urethra a sinistris foramine, per quod, dextero jam consolidato, devia urina ex recens rupto a sinistris acceleratore musculo subterfugiens, novam fibi viam aperuisset. Altera igitur a sinistris sectio instituenda fuisset, atque usus cereolorum continuandus; sed plurimis æger negotiis distentus, maluit morbi fibi parum molesti curationem in aliud tempus protrahere.

*MULIEBRIS ISCHURIAE HISTORIA.*

**T**NSignior multis in foeminis caruncula , sive papilla quædam sub urethra appareat, ad vaginæ orificium posita, cuius procul dubio appendix est. Eam longioris aliquando, & obtusioris columnæ instar pendentem vidi, in completis præsertim vaginæ prolapsibus, cuius superiori & anteriori parti nexa tunc erat.

Septembri mense superioris anni , quadragenaria in nosocomio aderat foemina , cuius corpus foedis undequaque, nigrisque pustulis obsitum erat, easque a syphilide natas primo intuitu omnes credidissent, quanquam ægra nullum unquam ejusmodi morbum se passam esse affirmaret. Quæcum balneis ad pessimum illud exanthematis genus uteretur, quinta ab incepto die urinæ detentio supervenit , quæ catheteris usum postulabat. Sed inopinatam in ejus immissione difficultatem chirurgi invenerunt. Quoddam enim carneum corpus ab anteriori vaginæ sede sursum exorrectum , totum fere urethræ locum occupabat, suaque mole urinæ, & catheteri viam impeditiebat. In superiori quidem , clitoridique appropinquanti

tumoris regione, conspicua, & profunda conspiciebatur ulcerosa cavitas, in cuius fundo urethræ meatum latitare certum erat, sed informis hujusmodi cæcusque sinus frustra cæspitantibus tentabatur. Consultum itaque fuit, ægram balneo iterum mergi, & auspicato evenit, ut urina sponte prodiret, neque amplius in posterum suppressuretur: laxato nempe, & nonnihil subsidente crassiori illo corpore, quod cæteroquin locus, & manifesta ejus cum anteriori vaginæ parte continuitas, merito ad papillam, quam superius descripsimus, mole auctam pertinere commonestrabant.

*MONS VENERIS IN HOMINE.*

**A**diposa illa pubis prominentia, quam veneris montem appellant, ad exteriores muliebrium genitalium partes proprie pertinet. Vidi tamen homines ita conformatos, ut similem omnino, ac in foeminis, montem præ se ferrent, licet reliquis alioquin partibus macilenti fuissent. Latior hisce hominibus pubis area apparebat; penis parvæ molis erat, idemque ex fovea imo prominentiæ loco insculpta exsurgere videbatur. In quodam hujusce generis cadavere copiosam ex inguine pinguedinem, ad medium usque scrotum utrinque descendentem, sectione compreriebam.

---

C  
*NATURALIS OMNIUM PECTORIS  
ET ABDOMINIS PARTIUM  
TRANSLOCATIO.*

**C**OLOMBIA Scista, annos nata 18., domo Sedriani in agro mediolanensi, ex febri intermittentia ægrotans, die 21. Octobris 1787., improviso sopore, & convulsionibus correpta decessit. Mortis causam in capite perscrutantes, nullam invenimus: referato pectore & abdome, omnia item sana apparuerunt. Verum non sine magna admiratione notatum est, universas ibi partes oppositum singulas locum tenere, ita ut quæ secundum naturam positæ a dextris sunt, omnino a sinistris essent, & contra. Perraro hujusmodi & singulari spectaculo inter cæteros adfuit vir clarissimus P. *Moscati* Præceptor noster æternum venerandus, qui similia se olim vidisse testatus est. Non usitata tamen res multos spectatum accivit, quamobrem non inutilem me operam naturum esse duxi,

si quæ accuratius perquisivi, hic summatim perstringam.

Mediastinum a dextris inclinatum, ampliore reddit alteram pectoris cavitatem, in qua pulmo trilobus, & dextro major. Cordis basis a sinistris, apex a dextris spectat; in anteriori pulmonis dextri limbo sinus conspicitur, qui cordis apicem contra ejus lateris costas pulsantem olim recipiebat. Auricula cordis dextra pulmonales venas admittit, sinistra cavas. Aorta ex dextro prodit ventriculo, arteria pulmonalis ex sinistro. Quoad illas vero sinuum venosorum appendiculas, quæ auriculam proprie referunt, eæ sic erant dispositæ, ut altera a dextris aortæ, a sinistris altera pulmonalis arteriæ, secus ac solent, prostarent. Ex binis utriusque ventriculi orificiis inversa iterum situs ratio observabatur; in dextro enim arteriosum orificio dextrum erat, auriculare sinistrum: contra vero in altero ventriculo se res habebat. Deinde in arteria pulmonali ramus sinister sub aorta gliscens, lœvum subibat pulmonem, & aorta dextrorsum inflexa, arcum faciebat inversum, ex quo juxta dextrum vertebrarum latus descendebat. Rami ex summo ejus arcu nascebantur subclavia, & carotis dextra, nec non subclavia sinistra, quæ præ dextra longior, carotidem sui lateris progi-

gnebat. **Œ**sophagus ad dextram vergebatur, & major azygos erat a sinistris, quemadmodum & thoracicus chyli ductus, qui tamen superius ad alterum latus inclinans, subclaviæ dextræ inferebatur. Ala diaphragmatis sinistra venam cavam inferiorem transmittebat; & sic de cæteris.

Neque minus completa videbatur abdominallium partium translocatio. Lien enim in dextro hypochondrio, hepar in sinistro occurrebant. Ventriculi fundus, perinde ac superius ejus orificium; mesenterii, & jejunii intestini initium, coli finis, omnia a dextris visebantur. Et vicissim a sinistris pylorus, duodenum, pancreatis caput, cæcum intestinum, mesenterii & ilei finis &c. Ren tandem sinister humiliori loco positus, breviori vena, & longiori invicem arteria instruebatur, eo quod sinistrum locum vena cava, dextrum aorta ad vertebrae tenebant.

Cæterum exlegis corporis singulæ partes optime erant constitutæ, & qui forte tum aderat Pictor, exteriorem ejus formam, diversaque membrorum rationes ad artis præcepta exigens, omnia tanquam normæ respondentia commendabat.

Simile exemplum a *Morando* observatum, in actis R. S. P. Academiæ cel. *Mery* accura-

tissime exposuit; nisi quod aliquem in ejus historia errorem subrepisse crediderim, ubi a dextris venam sine pari fuisse traditur (1).

(1) Ann. 1688. tom. 2.

# I N D E X.

<i>Morbis symmetrici, &amp; asymmetrici.</i>	Pag. 1
<i>Læsiones capitis.</i>	32
<i>De aliis capitis morbis pauca.</i>	50
<i>Quædam de Bronchocele.</i>	62
<i>Ingens abscessus subaxillaris.</i>	75
<i>Quædam de herniis.</i>	78
<i>Abscessus ex pelvi ad femur propagati.</i>	99
<i>De peculiari quadam abscessuum in perinæo ratione.</i>	110
<i>Muliebris ischuriæ historia.</i>	117
<i>Mons veneris in homine.</i>	119
<i>C Naturalis omnium pectoris, &amp; abdominis partium translocatio.</i>	120